

MESYUARAT KEDUA, PENGGAL KETIGA  
PARLIMEN KEEMPAT BELAS  
2020

**HARI RABU : 26 OGOS 2020**

**JAWAPAN-JAWAPAN BAGI PERTANYAAN-PERTANYAAN JAWAB**  
**LISAN YANG TIDAK DIJAWAB DI DALAM DEWAN**  
**( SOALAN NO. 11 HINGGA NO. 55 )**

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB PUAN RUBIAH BINTI HAJI WANG  
[ KOTA SAMARAHAN ]**

**TARIKH : 26 OGOS 2020 (RABU)**

**SOALAN**

**YB PUAN RUBIAH BINTI HAJI WANG [ KOTA SAMARAHAN ]** minta **MENTERI KOMUNIKASI DAN MULTIMEDIA** menyatakan langkah terkini pihak Kementerian dalam membasmi penyebaran maklumat tidak sahih dan palsu yang semakin meningkat sehingga boleh mengancam keselamatan negara dan perpaduan rakyat.

**JAWAPAN**

Tuan Yang di-Pertua,

1. Untuk makluman Ahli Yang Berhormat, kaedah terbaik dalam memerangi maklumat berita palsu adalah dengan 'membanjiri' ruang maklumat dengan berita benar. Sehubungan dengan itu, Kementerian dan agensi-agensi dibawah Kementerian akan meneruskan inisiatif kesedaran serta pengupayaan dan pendidikan pengguna atau “*user empowerment and education*” melalui pelbagai program advokasi dan kesedaran di media dan di lapangan. Gerak kerja inisiatif advokasi dan kesedaran adalah komitmen Kementerian untuk memupuk kesedaran awam mengenai gejala berita palsu, membudayakan amalan menyemak dan menentukan kesahihan sesuatu berita sebelum dikongsi atau disebarkan, serta membudayakan amalan menyebarkan kebenaran.
2. Pada masa yang sama, kolaborasi dan kerjasama baik yang telah sedia terjalin dengan penyedia platform media sosial seperti *Facebook*, *Google* dan *Twitter* akan terus diperkukuh dan diperkasakan terutamanya dalam usaha menurun atau memadamkan kandungan yang menyalahi undang-undang Malaysia, selaras dengan norma-norma serta nilai budaya negara. Ini selari dengan terma perkhidmatan serta piawaian komuniti pihak penyedia platform-platform berkenaan.
3. Dalam aspek penguatkuasaan, “Jawatankuasa Jenayah Siber” yang telah ditubuhkan antara PDRM dan SKMM juga akan terus digerakkan dan diperkasakan bagi menyelaraskan tindakan penguatkuasaan di bawah Kanun Keseksan dan Akta Komunikasi agar tindakan penguatkuasaan lebih strategik dan tersusun, dalam menangani kesalahan jenayah siber termasuklah yang berkaitan penyebaran kandungan, maklumat, berita atau laporan tidak benar atau palsu.
4. Menyedari kepentingan menangkis penularan berita palsu secara pantas dan tuntas, KKMM juga telah menubuhkan pasukan khas; Pasukan Respons Pantas (PRP) dengan kerjasama Majlis Keselamatan Negara (MKN) pada 24 Mac 2020 hasil cetusan ilham YB Menteri

Komunikasi dan Multimedia, bagi menangani penyebaran berita palsu berkaitan COVID-19.

5. Secara dasarnya, PRP KKMM membuat pemantauan terhadap isu-isu berkaitan dakwaan jangkitan COVID-19 termasuk isu berkaitan Kementerian Kesihatan Malaysia (KKM), Perintah Kawalan Pergerakan (PKP), Perintah Kawalan Pergerakan Diperketatkan (PKPD), Perintah Kawalan Pergerakan Bersyarat (PKPB) dan Pakej Rangsangan Ekonomi Prihatin Rakyat (PRIHATIN). Ini kerana isu-isu yang dinyatakan menarik perhatian rakyat dan berpotensi memberi impak negatif menimbulkan keresahan dalam kalangan rakyat sekiranya tidak ditangani lebih awal yang memungkinkan berlakunya insiden-insiden yang tidak diingini seperti *panic buying* dan rusuhan seperti yang berlaku di luar negara.

6. Prosedur Operasi Standard (SOP) PRP KKMM telah ditetapkan untuk mendapat pengesahan dan maklumbalas yang diperlukan daripada pihak berkaitan. Komunikasi dua hala antara PRP KKMM bersama pegawai kementerian / jabatan / agensi berkaitan bagi mendapatkan pengesahan kesahihan terhadap sesuatu isu kebiasaannya mengambil masa minimum selama 30 minit dan maksimum sehingga 3 jam. Sejurus memperoleh pengesahan bagi isu yang dikenalpasti, draf penafian berita palsu dikenali sebagai 'Pemakluman Berita Palsu' disediakan dalam kadar segera dan disiarkan mengikut waktu siaran yang ditetapkan. Bagaimanapun terdapat juga siaran khas bagi isu kritikal dan adhoc sekiranya menerima arahan daripada Pejabat Perdana Menteri (PMO).

7. Sehingga 14 Ogos 2020, sebanyak 365 penafian berita palsu telah diperjelaskan kepada masyarakat.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' DR. XAVIER JAYAKUMAR  
A/L ARULANANDAM [KUALA LANGAT]**

**TARIKH : 26 OGOS 2020 (RABU)**

**SOALAN**

Minta **MENTERI TENAGA DAN SUMBER ASLI** menyatakan potensi pengeluaran REE (Unsur Nadir Bumi) yang begitu bernilai ekonomi. Apakah langkah-langkah Kementerian untuk membangunkan potensi baru ini.

**JAWAPAN**

Tuan Yang di-Pertua,

Kementerian Tenaga dan Sumber Asli (KeTSA) melalui Jabatan Mineral dan Geosains Malaysia (JMG) masih lagi meneruskan kajian untuk menilai potensi sumber unsur nadir bumi bukan radioaktif (NR-REE) di kawasan-kawasan di seluruh Malaysia. Untuk makluman Ahli Yang Berhormat, pengekstrakan nadir bumi yang akan dibangunkan kelak adalah dari jenis "*ion adsorption clay*" yang mana tiada kandungan bahan radioaktif. Berdasarkan kajian semasa yang dijalankan oleh JMG, jumlah nilai sumber unsur nadir bumi adalah dianggarkan bernilai USD182 bilion.

**Kerangka Dasar**

KeTSA sedang membangunkan satu kerangka dasar dan dengan izin *Standard Operating Procedure* (SOP) yang akan menjadi panduan kepada agensi-agensi kerajaan dan penggiat industri bagi memastikan

industri ini dilaksanakan secara mampan dan tidak menjejaskan kelestarian alam sekitar.

Sehubungan itu, KeTSA telah mengariskan 9 teras yang akan menjadi panduan kepada penyediaan kerangka dasar pelaksanaan pembangunan industri perlombongan NR-REE di Malaysia seperti berikut:

- i) membangunkan penggiat industri;
- ii) pengenalan insentif;
- iii) pembangunan teknologi;
- iv) pewujudan zon/kluster;
- v) penyelarasan tadbir urus agensi;
- vi) penyelarasan perundangan;
- vii) penstrukturan industri unsur nadir bumi;
- viii) pangkalan data rizab unsur nadir bumi; dan
- ix) pembangunan kapasiti modal insan.

Untuk makluman Ahli Yang Berhormat, KeTSA juga sedang dalam proses merangka perundangan dan SOP bagi operasi perlombongan mineral NR-REE. Program kesedaran berbentuk simposium, webinar dan sesi libat urus yang berkaitan pembangunan NR-REE telah dan akan dilaksanakan bagi meyakinkan rakyat bahawa keselamatan dan kesejahteraan sememangnya perkara yang diutamakan dalam membangun sumber ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TAN SRI NOH BIN HAJI OMAR  
[ TANJONG KARANG ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan statistik terkini selain daripada Sekolah Kebangsaan yang telah bersetuju untuk pembelajaran tulisan jawi setelah mendapatkan persetujuan daripada Persatuan Ibu Bapa dan Guru (PIBG).

**JAWAPAN**

Tuan Yang di-Pertua,

Untuk makluman Ahli Yang Berhormat, Berkaitan dengan pengenalan tulisan jawi dalam mata pelajaran Bahasa Melayu, Kerajaan pada 14 Ogos 2019 telah membuat keputusan agar pengenalan tulisan jawi dalam mata pelajaran Bahasa Melayu terus dilaksanakan di Sekolah Jenis Kebangsaan (SJK) dan sekolah mubaligh bantuan Kerajaan jika dipersetujui oleh Persatuan Ibu Bapa dan Guru (PIBG) serta murid.

Berdasarkan rekod KPM sehingga pada 30 Jun 2020, hanya 2.9% daripada keseluruhan sekolah jenis kebangsaan (SJK) bersetuju untuk pelaksanaan pengenalan tulisan jawi untuk murid Tahun 4 pada tahun 2020. Bagi SJK Cina, 2.77% daripada 1,299 sekolah bersetuju dengan pelaksanaan tersebut manakala bagi SJK Tamil hanya 0.2% daripada 525 sekolah bersetuju dengan pelaksanaan tersebut.

Sekian, terima kasih.



**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KEDUA, PENGKAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN HANNAH YEOH TSEOW SUAN  
[ SEGAMBUT ]**

**TARIKH : 26 OGOS 2020 (RABU)**

**SOALAN**

**PUAN HANNAH YEOH TSEOW SUAN [ SEGAMBUT ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status pelaksanaan terkini Pelan Strategi Kebangsaan Bagi Menangani Punca Perkahwinan Bawah Umur yang telah dilancarkan pada Januari 2020 (Pelan) dan siapakah yang dipertanggungjawabkan untuk memantau pelaksanaan Pelan ini.

**JAWAPAN**

**Tuan Yang di-Pertua,**

Kerajaan komited meneruskan usaha bagi menangani punca perkahwinan bawah umur melalui pelaksanaan Pelan Strategi Kebangsaan Bagi Menangani Punca Perkahwinan Bawah Umur 2020 sehingga 2025. Pelan ini mengandungi pelbagai program dan tindakan yang akan dilaksanakan sehingga ke peringkat akar umbi untuk menangani enam faktor yang telah dikenal pasti sebagai punca perkahwinan bawah umur. Program dan tindakan yang dirancang sepanjang tempoh lima tahun pelaksanaan pelan akan mencerminkan isu-isu yang merentas pelbagai sektor seperti perundangan, keibubapaan, sistem sokongan sosial, pendidikan, kesihatan dan kesedaran.

Bagi memastikan pelaksanaan Pelan ini berjalan dengan lancar maka satu Jawatankuasa Pemandu yang dipengerusikan oleh Ketua Setiausaha Kementerian ditubuhkan untuk memantau pelaksanaan pelan serta perkembangan program dan tindakan yang telah dirancang bagi setiap strategi di bawah faktor. Selain itu, Jawatankuasa ini turut berfungsi sebagai platform untuk agensi pelaksana yang terlibat melaporkan pelaksanaan, isu dan cabaran serta cadangan penambahbaikan terhadap setiap program atau tindakan yang dilaksanakan. Jawatankuasa ini juga akan berkuat kuasa dari selama lima tahun sepanjang tempoh pelaksanaan Pelan. Mesyuarat Jawatankuasa Pemandu bilangan 1 bagi tahun 2020 telah diadakan pada 24 Ogos 2020.

**Tuan Yang di-Pertua,**

Kementerian juga bercadang untuk mengadakan beberapa siri konsultasi di semua negeri mengenai cadangan kenaikan had umur perkahwinan bagi lelaki dan perempuan. Kementerian juga akan meneruskan usaha untuk mengadakan perbincangan bersama UNICEF yang tertangguh disebabkan oleh Perintah Kawalan Pergerakan (PKP). Sesi libat urus juga akan diadakan dengan melibatkan kerjasama pelbagai pihak seperti Kementerian/Jabatan Kerajaan, Ahli Akademik, pakar hak asasi kanak-kanak, Pertubuhan Bukan Kerajaan (NGO), agamawan serta wakil Kerajaan negeri Sabah dan Sarawak bersama komuniti dari etnik tertentu yang masih mengamalkan perkahwinan bawah umur melalui undang-undang adat.

Kita amat berharap supaya kerjasama dari semua pihak termasuk rakan daripada pihak pembangkang, ahli akademik, NGO dapat diteruskan sebagai rakan strategik bersama Kementerian dalam mengekang perkahwinan bawah umur ini dan seterusnya merealisasikan potensi penuh kanak-kanak di negara ini.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. DATO' SERI DR. SHAHIDAN BIN KASSIM [ARAU]**  
**TARIKH : 26 OGOS 2020 (RABU)**

**SOALAN**

**DATO' SERI DR. SHAHIDAN BIN KASSIM [ ARAU ]** minta **MENTERI KEWANGAN** menyatakan berapakah jumlah hutang negara dari Mei 2018 sehingga Februari 2020. Kita diberitahu bahawa dalam jangka pendek defisit negara akan meningkat. Apakah perancangan khusus jangka panjang untuk mengurangkan defisit hutang negara di masa hadapan.

**JAWAPAN**

Tuan Yang di-Pertua,

1. Berdasarkan pengiraan had statutori, nisbah hutang terkumpul Kerajaan Persekutuan kepada KDNK pada akhir 2018 adalah 47.5%, akhir-2019 (48.7%) dan akhir-Jun 2020 (53.2%), masih di bawah had 55% KDNK yang ditetapkan.
2. Susulan penularan pandemik COVID-19, Kerajaan telah memperkenalkan pakej rangsangan dan pemulihan ekonomi bernilai RM295 bilion untuk memastikan pertumbuhan ekonomi negara terus berdaya tahan. Pakej rangsangan dan pemulihan ekonomi ini hanya melibatkan suntikan langsung fiskal berjumlah RM45 bilion. Setelah mengambil kira pengurangan hasil berikutan unjuran Keluaran Dalam Negeri Kasar (KDNK) yang lebih rendah dan kejatuhan harga minyak

mentah dunia serta pertambahan perbelanjaan bagi melaksanakan pakej rangsangan dan pemulihan ekonomi, defisit fiskal pada tahun 2020 dijangka meningkat sekitar 5.8% hingga 6.0% berbanding 3.2% daripada KDNK.

3. Semua langkah yang telah diumumkan dalam pakej rangsangan dan pemulihan ekonomi tersebut adalah bersifat *one-off* dan tidak akan terus membebankan kewangan Kerajaan Persekutuan dalam jangka masa sederhana dan panjang. Ini adalah antara strategi Kerajaan bagi mengurangkan defisit fiskal dalam jangka masa sederhana secara berperingkat seterusnya memastikan kedudukan fiskal dan hutang Kerajaan Persekutuan kekal pada paras terkawal.

4. Kerajaan akan meneruskan langkah konsolidasi fiskal dengan memberi tumpuan kepada usaha untuk meningkatkan kutipan hasil dan kecekapan perbelanjaan bagi mengukuhkan lagi kedudukan kewangan serta memastikan paras hutang Kerajaan terkawal. Pada masa ini, Kerajaan mengguna pakai Kerangka Fiskal Jangka Sederhana atau dengan izin, *Medium Term Fiscal Framework* (MTFF) sebagai panduan dalam menggubal strategi ke arah konsolidasi fiskal untuk jangka masa sederhana (3 hingga 5 tahun) di samping selari dengan Rancangan Malaysia jangka panjang. Kerajaan juga dalam proses merangka Akta Tanggungjawab Fiskal (FRA) yang dijangka akan dibentangkan pada 2021 untuk mengukuhkan tadbir urus, ketelusan dan akauntabiliti dalam pengurusan fiskal. Dalam masa yang sama, Kerajaan mengutamakan pinjaman dalam negeri bagi memastikan risiko tukaran wang asing dan kos pinjaman yang lebih rendah. Pematuhan kepada disiplin fiskal ini adalah penting bagi memastikan kedudukan kewangan negara kekal kukuh serta meningkatkan ruang fiskal pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan apakah hasil yang diperoleh daripada Program GENIUS Negara dan bagaimanakah hala tuju kanak-kanak ini setelah 10 tahun program ini dilaksanakan.

**JAWAPAN**

Tuan Yang di-Pertua,

Untuk makluman Ahli Yang Berhormat, Program GENIUS, yang dahulunya dikenali sebagai PERMATA telah mula dilaksanakan pada tahun 2006 dan pada ketika itu dikendalikan oleh Bahagian PERMATA, Jabatan Perdana Menteri (JPM). Walau bagaimanapun, pada 30 Mei 2018, Kerajaan memutuskan supaya Bahagian PERMATA di bawah JPM dipindahkan ke Kementerian Pendidikan Malaysia (KPM). Keputusan ini dibuat setelah mengambil kira tujuan dan objektif penubuhan kesemua Program PERMATA yang menyediakan pendidikan berkualiti dari awal usia kanak-kanak sehinggalah ke peringkat pra-universiti. Kerajaan juga telah bersetuju supaya nama PERMATA ditukar kepada GENIUS selaras dengan pembaharuan struktur tadbir urus Program tersebut.

Secara keseluruhan, Program GENIUS Negara adalah bertujuan untuk menyediakan kanak-kanak berumur satu (1) hingga empat (4) tahun yang lengkap dalam aspek sahsiah, emosi, fizikal dan kognitif sebelum memasuki sekolah aliran perdana. Fokus program ini adalah

untuk memastikan hala tuju kanak-kanak berkembang secara holistik berdasarkan enam (6) bidang perkembangan iaitu (i) Perkembangan Sahsiah, Sosio-Emosi Dan Kerohanian; (ii) Perkembangan Bahasa, Komunikasi Dan Literasi Awal; (iii) Perkembangan Deria Dan Pemahaman Dunia Persekitaran; (iv) Perkembangan Awal Matematik Dan Pemikiran Logik; (v) Perkembangan Kreativiti Dan Estetika; dan (vi) Perkembangan Fizikal dan Psikomotor. Dengan ini anak-anak tidak akan menjurus kepada pencapaian akademik semata-mata. Bagi tahun 2007 hingga 2019, seramai 8,790 kanak-kanak telah berjaya mengikuti Program GENIUS Negara. Sehingga kini, terdapat 90 Pusat Anak GENIUS Negara (PAGN) dengan purata enrolmen sebanyak 2,083 orang setahun.

Untuk makluman Ahli Yang Berhormat, KPM sentiasa berusaha menambah baik Program GENIUS Negara. Antara usaha yang dilakukan adalah dengan melaksanakan Kajian Keberkesanan Program GENIUS Negara yang sedang dijalankan mulai Mac 2020. Kajian ini dijalankan oleh Pusat Penyelidikan Pembangunan Kanak-kanak Negara (NCDRC), Universiti Pendidikan Sultan Idris (UPSI) untuk menilai keberkesanan perkembangan kanak-kanak berdasarkan tempoh kanak-kanak mengikuti program di PAGN ini.

Di samping itu, KPM juga sentiasa membuat penambahbaikan Program GENIUS Negara dalam aspek pemurnian Kurikulum Asuhan Pendidikan Awal Kanak-kanak dan juga Modul Kursus Asuhan dan Pendidikan Awal Kanak-kanak PERMATA (KAP). Kurikulum dan modul ini turut digunapakai oleh Taman Asuhan Kanak-Kanak (TASKA) Kerajaan seperti TASKA KEMAS, TASKA PERPADUAN dan TASKA Swasta yang berdaftar dengan Kementerian Pembangunan Wanita, Keluarga dan Masyarakat.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HAJI WAN HASSAN BIN MOHD  
RAMLI [ DUNGUN ]**

**TARIKH : 26 OGOS 2020 (RABU)**

**SOALAN**

**TUAN HAJI WAN HASSAN BIN MOHD RAMLI [ DUNGUN ]** minta **MENTERI PERTANIAN DAN INDUSTRI MAKANAN** menyatakan apakah rancangan bagi tujuan menarik minat belia dalam sektor Pertanian dan industri pembuatan makanan khususnya dalam berhadapan situasi pemulihan pasca COVID-19.

**JAWAPAN**

Tuan Yang Dipertua,

Kementerian amat cakna dengan situasi semasa yang dihadapi para belia terutama sepanjang tempoh PKP. Oleh itu, Kementerian melipat ganda usaha membantu para belia untuk menghadapi situasi pemulihan pasca COVID-19. Usaha Kementerian ini merangkumi pelaksanaan:

**1. Program Agropreneur Muda**

Bagi membantu golongan muda, mulai Jun 2020, permohonan Geran Agropreneur Muda dibuka sepanjang tahun. Sebelum ini, permohonan geran ini tertakluk kepada tempoh masa tertentu iaitu hanya pada bulan Januari, Mei dan September.

Kementerian melalui Unit Agropreneur Muda secara aktif menganjurkan kursus-kursus webinar, sesi taklimat Geran Agropreneur Muda dan perkongsian kisah-kisah kejayaan agropreneur muda secara langsung melalui *live streaming* di media sosial.

Kementerian turut menganjurkan Jelajah Agropreneur Muda di seluruh negara bagi mempromosikan Program Agropreneur Muda dalam kalangan belia. Malahan, pelbagai aktiviti dilaksanakan seperti pemantauan projek, taklimat dan lawatan kerja ke projek-projek agropreneur muda yang sedang dijalankan untuk memastikan para belia sentiasa diberikan keutamaan dan bantuan bimbingan dari semasa ke semasa.

**2. Program Mobiliti Tenaga Kerja dalam Sektor Agromakanan atau *MyFutureAgro***

Kementerian melaksanakan Program Mobiliti Tenaga Kerja Dalam Sektor Agromakanan atau *MyFutureAgro* khas kepada yang terkesan akibat penularan wabak COVID-19. Di bawah Pelan Pemulihan Ekonomi Jangka Pendek (PENJANA), Kementerian telah diluluskan peruntukan sebanyak RM40 juta untuk melaksanakan Program Mobiliti Tenaga Kerja Dalam Sektor Agromakanan atau *MyFutureAgro* pada tahun ini dan tahun 2021. Kementerian menyasarkan seramai 6,000 peserta yang terdiri daripada graduan, penganggur dan lepasan sekolah akan mendapat manfaat sepanjang program ini dilaksanakan sehingga tahun 2021.

Sekian, terima kasih.



**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SERI DR. WAN AZIZAH WAN ISMAIL [ PANDAN ]**

**TARIKH : 26 OGOS 2020 (RABU)**

**SOALAN**

**DATO' SERI DR. WAN AZIZAH WAN ISMAIL [ PANDAN ]** minta **MENTERI PEMBANGUNAN WANITA, KELUARGA DAN MASYARAKAT** menyatakan pendirian Kementerian berhubung perkahwinan kanak-kanak dan apakah strategi dan tindakan Kementerian bagi menangani isu-isu sosial yang merupakan penyebab kepada berlakunya perkahwinan kanak-kanak.

**JAWAPAN**

Tuan Yang di-Pertua,

Kerajaan komited meneruskan usaha bagi menangani punca perkahwinan bawah umur melalui pelaksanaan Pelan Strategi Kebangsaan Bagi Menangani Punca Perkahwinan Bawah Umur 2020 sehingga 2025. Pelan ini mengandungi pelbagai program dan tindakan yang akan dilaksanakan sehingga ke peringkat akar umbi untuk menangani enam faktor yang telah dikenal pasti sebagai punca perkahwinan bawah umur. Program dan tindakan yang dirancang sepanjang tempoh lima tahun pelaksanaan pelan akan mencerminkan isu-isu yang merentas pelbagai sektor seperti perundangan, keibubapaan, sistem sokongan sosial, pendidikan, kesihatan dan kesedaran.

Bagi memastikan pelaksanaan Pelan ini berjalan dengan lancar maka satu Jawatankuasa Pemandu yang dipengerusikan oleh Ketua Setiausaha Kementerian ditubuhkan untuk memantau pelaksanaan pelan serta perkembangan program dan tindakan yang telah dirancang bagi setiap strategi di bawah faktor. Selain itu, Jawatankuasa ini turut berfungsi sebagai platform untuk agensi pelaksana yang terlibat melaporkan pelaksanaan, isu dan cabaran serta cadangan penambahbaikan terhadap setiap program atau tindakan yang dilaksanakan. Jawatankuasa ini juga akan berkuat kuasa dari selama lima tahun sepanjang tempoh pelaksanaan Pelan. Mesyuarat Jawatankuasa Pemandu bilangan 1 bagi tahun 2020 telah diadakan pada 24 Ogos 2020.

**Tuan Yang di-Pertua,**

Kementerian juga bercadang untuk mengadakan beberapa siri konsultasi di semua negeri mengenai cadangan kenaikan had umur perkahwinan bagi lelaki dan perempuan. Kementerian juga akan meneruskan usaha untuk mengadakan perbincangan bersama UNICEF yang tertangguh disebabkan oleh Perintah Kawalan Pergerakan (PKP). Sesi libat urus juga akan diadakan dengan melibatkan kerjasama pelbagai pihak seperti Kementerian/Jabatan Kerajaan, Ahli Akademik, pakar hak asasi kanak-kanak, Pertubuhan Bukan Kerajaan (NGO), agamawan serta wakil Kerajaan negeri Sabah dan Sarawak bersama komuniti dari etnik tertentu yang masih mengamalkan perkahwinan bawah umur melalui undang-undang adat.

Kita amat berharap supaya kerjasama dari semua pihak termasuk rakan daripada pihak pembangkang, ahli akademik, NGO dapat diteruskan sebagai rakan strategik bersama Kementerian dalam mengekang perkahwinan bawah umur ini dan seterusnya merealisasikan potensi penuh kanak-kanak di negara ini.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. DATO' SERI HAJI ABDUL HADI  
AWANG [MARANG]**  
**TARIKH : 26 OGOS 2020 (RABU)**

**SOALAN**

**DATO' SERI HAJI ABDUL HADI AWANG [ MARANG ]** minta **MENTERI KEWANGAN** menyatakan apakah langkah yang diambil oleh Kerajaan bagi menurunkan defisit fiskal belanjawan negara yang dijangka meningkat susulan pelaksanaan Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA).

**JAWAPAN**

Tuan Yang di-Pertua,

1. Susulan penularan pandemik COVID-19, Kerajaan telah memperkenalkan pakej rangsangan dan pemulihan ekonomi bernilai RM295 bilion untuk memastikan pertumbuhan ekonomi negara terus berdaya tahan. Pakej berkenaan hanya melibatkan suntikan langsung fiskal berjumlah RM45 bilion. Setelah mengambil kira pengurangan hasil berikutan unjuran Keluaran Dalam Negeri Kasar (KDNK) yang lebih rendah dan kejatuhan harga minyak mentah dunia serta pertambahan perbelanjaan bagi melaksanakan tersebut, defisit fiskal pada tahun 2020 dijangka meningkat sekitar 5.8% hingga 6.0% berbanding 3.2% daripada KDNK. Berdasarkan laporan oleh agensi penarafan antarabangsa Moody's [1], negara serantau juga dijangka mencatat defisit fiskal yang tinggi seperti

Singapura sekitar 15%, Jepun 8%, China 6.7% dan Korea Selatan 4% kepada KDNK masing-masing.

2. Semua langkah yang telah diumumkan dalam pakej rangsangan dan pemulihan ekonomi tersebut adalah bersifat *one-off* dan tidak akan terus membebankan kewangan Kerajaan Persekutuan dalam jangka masa sederhana dan panjang. Ini adalah antara strategi Kerajaan bagi mengurangkan defisit fiskal dalam jangka masa sederhana secara berperingkat seterusnya memastikan kedudukan fiskal dan hutang negara kekal pada paras terkawal. Kerajaan akan meneruskan langkah konsolidasi fiskal dengan memberi tumpuan kepada usaha untuk meningkatkan kutipan hasil dan kecekapan perbelanjaan bagi mengukuhkan lagi kedudukan kewangan Kerajaan.

3. Untuk makluman Ahli Yang Berhormat, Kerajaan pernah menurunkan kadar defisit fiskal sebelum ini daripada 6.7% kepada KDNK pada tahun 2009 selepas krisis ekonomi dunia, atau dengan izin, *Global Financial Crisis*, kepada 3.8% pada tahun 2013 (iaitu lebih kurang 3-4 tahun selepas GFC) dan 3.4% pada hujung tahun 2019. Ini adalah hasil disiplin dan pengurusan fiskal berhemah yang diamalkan oleh Kerajaan.

4. Pada masa ini, Kerajaan mengguna pakai Kerangka Fiskal Jangka Sederhana atau dengan izin, *Medium Term Fiscal Framework* (MTFF) sebagai panduan dalam menggubal strategi ke arah konsolidasi fiskal untuk jangka sederhana (3 hingga 5 tahun) di samping selari dengan Rancangan Malaysia jangka panjang. Selain itu, Kerajaan juga dalam proses merangka Akta Tanggungjawab Fiskal (FRA) untuk memastikan pengurusan fiskal dan hutang yang lebih telus dan berdisiplin.

Nota [1]: Laporan agensi penarafan antarabangsa Moody's bertarikh 3 Julai 2020 (Singapura), 1 Jun 2020 (Jepun), 14 Mei 2020 (China) dan 23 Jun 2020 (Korea Selatan).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN AKMAL NASRULLAH BIN  
MOHD. NASIR [ JOHOR BAHRU ]**

**TARIKH : 26 OGOS 2020 (RABU)**

**SOALAN**

**YB TUAN AKMAL NASRULLAH BIN MOHD. NASIR [JOHOR BAHRU]**  
minta **MENTERI KOMUNIKASI DAN MULTIMEDIA** menyatakan :

- a) kadar peratusan penembusan rangkaian fiber optik di Johor Bahru;  
dan
- b) apakah perancangan Kerajaan untuk meningkatkan akses  
rangkaian fiber optik dan internet berkelajuan tinggi di seluruh  
negara.

**JAWAPAN**

Tuan Yang di-Pertua,

1. Untuk makluman Ahli Yang Berhormat, kadar penembusan jalurlebar bagi 100 penduduk di Johor adalah sebanyak 135.5% sehingga suku tahun pertama 2020. Ini bersamaan dengan 5,502,200 bilangan langganan di Johor di mana 384,600 langganan bagi jalur lebar dan 5,117,600 langganan bagi jalur lebar mudah alih.
2. Kerajaan melalui Suruhanjaya Komunikasi dan Multimedia Malaysia (SKMM) sentiasa berusaha dalam melaksanakan pelbagai inisiatif bagi meningkatkan liputan dan kualiti perkhidmatan jalur lebar berkelajuan tinggi yang menggunakan rangkaian gentian optik di seluruh negara.
3. Untuk meningkatkan kualiti perkhidmatan jalur lebar talian tetap, pihak Suruhanjaya Komunikasi dan Multimedia Malaysia (SKMM) juga sedang giat melaksanakan inisiatif penaiktarafan rangkaian berasaskan tembaga kepada rangkaian gentian optik yang melibatkan sebanyak 377,360 pelanggan sedia ada di seluruh negara. Inisiatif yang dijalankan menerusi Telekom Malaysia Berhad ini dijangka siap menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.
4. Pada masa yang sama, SKMM juga membuat perancangan dengan pihak industri untuk memantapkan kualiti dan liputan perkhidmatan diseluruh negara menggunakan pelbagai teknologi.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI PANGLIMA MADIUS TANGAU  
[ TUARAN ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan apakah kolaborasi pintar dan penyelarasan tanggungjawab dan tugas di antara Kementerian Pelajaran Malaysia dengan Kementerian Pendidikan dan Inovasi Sabah, apakah langkah-langkah Kementerian memastikan pembelajaran dalam talian di Sabah dapat dilaksanakan sepenuhnya terutama sekali selepas begitu banyak keluhan dalam perkara ini sepanjang tempoh Perintah Kawalan Pergerakan kerana pandemik COVID-19.

**JAWAPAN**

Tuan Yang di-Pertua,

Kementerian Pendidikan Malaysia (KPM) terus komited untuk memastikan semua murid di seluruh negara tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh PKP. Bagi negeri Sabah, KPM melalui Jabatan Pendidikan Negeri (JPN) Sabah sentiasa mengadakan perbincangan bersama-sama Kementerian Pelajaran dan Inovasi Sabah serta Suruhanjaya Komunikasi dan Multimedia (SKMM) bagi meningkatkan keberkesanan pelaksanaan *Home-based Learning*, antaranya menggalakkan murid menggunakan kemudahan Pusat Internet Desa.

KPM juga akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa.

Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuklah pelaksanaan *Home-based Learning*. Antara usaha yang sedang dirancang adalah menggubal Modul Pelaksanaan *Home-based Learning* sebagai panduan untuk guru-guru, bekerjasama dengan Kementerian Komunikasi dan Multimedia untuk menambah waktu siaran rancangan TV Pendidikan dan membimbing guru dalam memperkasa pelaksanaan pengajaran dan pembelajaran menggunakan pelbagai aplikasi terkini.

Untuk makluman Ahli Yang Berhormat, KPM sentiasa berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid. Kaedah *Home-based Learning* ini dilaksanakan melalui pelantar pembelajaran digital iaitu MOE-DL, yang kemudiannya dikenali sebagai *Digital Education Learning Initiative Malaysia* (DELIMa). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP, kuiz dan video permainan pembelajaran. Selain itu, ibu bapa juga boleh akses EduwebTV dan CikgooTube untuk membantu dalam pembelajaran anak mereka di rumah.

Selain daripada itu, KPM juga berusaha untuk memastikan semua murid mendapat akses pembelajaran secara seragam, termasuk juga murid di kawasan luar bandar dan pedalaman serta kumpulan murid B40. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan, rancangan radio pendidikan dan serahan bahan pembelajaran kepada murid.

KPM akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuk pelaksanaan *Home-based Learning* dengan mengambil kira pandangan pelbagai pihak termasuk di peringkat negeri.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE EMPAT BELAS**

---

**PERTANYAAN : LISAN**

**DARIPADA : PUAN MARIA CHIN BINTI ABDULLAH  
[ PETALING JAYA ]**

**TARIKH : 26 OGOS 2020 (RABU)**

**SOALAN**

Minta **MENTERI PERTANIAN DAN INDUSTRI MAKANAN** menyatakan langkah Kementerian untuk menjaga kebajikan dan bekalan hidup golongan pekerja dalam industri pertanian dan langkah Kementerian untuk memastikan kemampanan industri ini dalam jangka masa panjang.

**JAWAPAN**

Yang di-Pertua,

1. Dalam usaha memastikan kemampanan industri ini dalam jangka masa panjang, antara usaha menjaga kebajikan dan bekalan hidup golongan pekerja dalam industri pertanian adalah:

**Petani/Pesawah**

2. Kementerian melalui Jabatan Pertanian dan LPP telah melaksanakan inisiatif berikut bagi menjaga kebajikan dan bekalan hidup petani:

i. **Insentif-insentif pertanian;**

Pemberian insentif meliputi input pertanian seperti benih, baja dan racun; pembangunan kawasan, pembinaan pusat pengumpulan dan pemprosesan serta stor; dan insentif hasil di bawah projek dan

## SOALAN NO : 22

program. Kadar insentif kerajaan yang diperuntukkan sebanyak RM10,000/ha sehingga maksimum RM50,000/ha.

ii. **Tabung Bantuan Bencana Tanaman Padi; dan**

Tabung ini bertujuan membantu petani dan pengusaha padi yang mengerjakan sawah di dalam dan di luar jelapang padi yang terlibat dengan kejadian bencana alam, penyakit dan lain-lain kejadian bencana yang akan diperaku dan diisytiharkan Jabatan Teknikal dan Jawatankuasa Teknikal (TBTP).

iii. **Skim-skim di bawah Tabung Pembangunan Usahaniaga Peladang (TPUP) dan Tabung Pembangunan Usahawan Kor Tani (TPUK).**

Tabung ini menawarkan pembiayaan kepada ahli-ahli Pertubuhan Peladang Kawasan dan ahli-ahli Kor Tani daripada RM5,000 – RM100,000.

### **Penternak**

3. Bagi sektor ternakan, Kementerian menyediakan bantuan insentif geran pepadanan pembiayaan bagi ternakan ruminan (Program Rintis PROPER) melalui bantuan induk pembiak ternakan ruminan (lembu, kambing, bebiri) dan Program Pembangunan Industri Tenusu Negara merangkumi aktiviti pembiakbakaan, tanaman makanan ternakan, transformasi usahawan tenusu dan peningkatan kualiti susu.

### **Nelayan**

4. Bagi golongan nelayan antara inisiatif yang telah dilaksanakan oleh Kementerian adalah:

i. **Pemberian insentif Elaun Sara Hidup (ESH)** berjumlah RM250/bulan dan **Subsidi minyak diesel dan petrol** pada kadar RM1.65/liter;

ii. **Skim Perlindungan Keselamatan Nelayan;**

## SOALAN NO : 22

Skim ini bertujuan sebagai persediaan kewangan luar jangka golongan nelayan sekiranya berlaku kejadian kemalangan atau yang tidak diingini dan telah diperkenalkan sejak bulan Mei 2012. Manfaat perlindungan yang diperolehi oleh nelayan adalah sehingga RM150,000.00.

iii. **Tabung Bantuan Bencana Alam Nelayan; dan**

Tabung ini memberi **bantuan dan sumbangan segera dalam bentuk kewangan** kepada nelayan yang tidak diinsuranskan sekiranya berlaku kemalangan, kemusnahan atau kerosakan harta benda dan kehilangan nyawa.

iv. **Skim-skim di bawah Pinjaman Dana Nelayan;**

Skim ini menyediakan pinjaman mudah bagi pembelian bot dan peralatan baharu bagi meningkatkan keupayaan bot sedia ada, pinjaman modal operasi, pinjaman kecemasan untuk nelayan dan modal pusingan pemasaran untuk Persatuan Nelayan seperti:

- a) Skim Pinjaman Nelayan Komersil (SNEK)
- b) Skim Pinjaman Nelayan Pantai (SNEP)
- c) Skim Pinjaman Enjin Dalam (SPED)

5. Kementerian juga **dalam usaha** untuk membangunkan Skim Perlindungan Takaful Agromakanan yang bertujuan untuk membolehkan aktiviti pertanian diteruskan apabila dilanda bencana bagi memastikan impak yang minimum terhadap bekalan makanan dan secara tidak langsung, sebagai bantuan bagi meringankan kesukaran yang dihadapi. Skim ini masih dalam penelitian MAFI bersama Bank Negara Malaysia (BNM) dan pihak industri bagi memastikan model yang sesuai boleh dibangunkan.

6. Untuk memastikan kemampanan industri ini dalam jangka masa panjang, Kementerian telah melaksanakan inisiatif berikut:

- i. memodenkan sektor agromakanan melalui penggunaan teknologi. Kementerian melalui Dasar Agromakanan Negara telah

## SOALAN NO : 22

memulakan langkah dengan memperkenalkan teknologi-teknologi yang bersesuaian mengikut peredaran masa;

- ii. pembangunan infrastruktur pertanian seperti penyediaan prasarana, kemudahan logistik dan pengangkutan bagi membantu aktiviti pengumpulan hasil dan pemasaran seperti pasar tani dan nelayan, pusat pengumpulan dan pengedaran (CDC);
- iii. meremajakan sektor pertanian seperti mempergiatkan Program Agropreneur Muda bagi menggalakkan penyertaan usahawan muda dalam bidang pertanian;
- iv. merencanakan industri hiliran melalui Industri Asas Tani bagi merangsang pengeluaran; dan
- v. melaksanakan program yang dapat meningkatkan pendapatan sampingan kepada golongan sasar di bawah Kementerian seperti Program Rezeki Tani dan Program Peningkatan Pendapatan Golongan B40.

7. Di samping itu, Kerajaan juga menyokong peranan pihak swasta dalam memajukan sektor agromakanan bagi menjamin sekuriti agromakanan negara melalui pemberian insentif cukai pendapatan kepada pelabur dalam sektor agromakanan dan program pengembangan bagi tujuan penyaluran maklumat teknikal.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' SERI UTAMA HAJI MUKHRIZ  
BIN TUN DR. MAHATHIR [ JERLUN ]**

**TARIKH : 26 OGOS 2020 (RABU)**

**SOALAN**

**YB DATO' SERI UTAMA HAJI MUKHRIZ BIN TUN DR. MAHATHIR  
[ JERLUN ]** minta **MENTERI KOMUNIKASI DAN MULTIMEDIA**  
menjelaskan tentang pelaksanaan teknologi 5G yang rintisnya sedang  
dilaksanakan di Langkawi, seperti berikut :

- a) kaedah meluaskan liputan 5G lebih menyeluruh ke kawasan luar bandar; dan
- b) peluang-peluang pekerjaan yang bakal wujud melalui ledakan teknologi 5G.

**JAWAPAN**

Tuan Yang di-Pertua,

**(a)**

1. Untuk makluman Ahli Yang Berhormat, di Langkawi, Kedah sejumlah 35 kes-kes kegunaan 5G di 25 live site sedang didemonstrasikan meliputi enam (6) vertikal iaitu:

- i. Bandar Pintar
- ii. Hiburan/ Media
- iii. Pelancongan,
- iv. Penjagaan Kesihatan Digital
- v. Pertanian
- vi. Pendidikan

2. Pelaburan daripada enam buah syarikat untuk membangunkan kes-kes kegunaan 5G di Langkawi, Kedah dianggarkan berjumlah RM101 juta.

3. Kerajaan mensasarkan perkhidmatan 5G akan diperkenalkan secara komersial untuk industri vertikal tertentu dahulu dan kemudiannya kepada umum secara berperingkat di kawasan-kawasan terpilih setelah proses pengagihan spektrum dimuktamadkan. Oleh yang demikian, industri vertikal tertentu yang akan dikenalpasti dan berpotensi untuk menggunakan 5G di kawasan luar bandar akan mendapat liputan 5G.

**(b)**

4. Menurut Institut Penyelidikan Ekonomi Malaysia. (MIER), pelaksanaan 5G di Malaysia dijangka akan mewujudkan lebih daripada 39,000 pekerjaan baru, manakala jumlah sumbangan kepada (Keluaran Dalam Negara Kasar) KDNK dari aktiviti berkaitan 5G dari 2021 hingga 2025 dianggarkan berjumlah RM12.7 bilion.

**PEMBERITAHUAN PERTANYAAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN LOKE SIEW FOOK [ SEREMBAN ]**

**TARIKH : 26 OGOS 2020 (RABU)**

**SOALAN**

Minta **MENTERI PENGANGKUTAN** menyatakan statistik dan prestasi pengendalian kontena oleh pelabuhan-pelabuhan utama di Malaysia untuk separuh tahun yang pertama 2020 (1H 2020) khususnya untuk Pelabuhan Klang, Pelabuhan Tanjung Pelepas dan Pelabuhan Pulau Pinang berbanding dengan tahun-tahun yang lepas. Apakah langkah khusus yang diambil Kerajaan untuk merancakkan lagi industri logistik dan pelabuhan kita.

**JAWAPAN**

Yang di-Pertua,

1. Untuk makluman Yang Berhormat, statistik dan prestasi pengendalian kontena (TEU) khususnya Pelabuhan Klang, Pelabuhan Tanjung Pelepas dan Pelabuhan Pulau Pinang bagi separuh tahun yang pertama 2020 (1H 2020) berbanding separuh tahun yang pertama tahun 2018 dan 2019 adalah seperti berikut:

<b>Pelabuhan</b>	<b>2018 (TEU)</b>	<b>%</b>	<b>2019 (TEU)</b>	<b>%</b>	<b>1H 2020 (TEU)</b>
Port Klang	5,874,912	↑ 12.38	6,602,672	↓ 9.31	<b>5,987,501</b>
PTP	4,382,002	↑ 4.58	4,582,977	↑ 1.28	<b>4,641,885</b>
Pulau Pinang	744,925	↑ 0.98	737,615	↓ 7.85	<b>679,688</b>

2. Pelabuhan Klang telah mencatatkan peningkatan sebanyak 12.38% daripada 5.87 juta TEU (2018) kepada 6.6 juta TEU (2019). Peningkatan sebanyak 4.58% direkodkan bagi Pelabuhan Tanjung Pelepas (PTP) iaitu daripada 4.38 juta TEU (2018) kepada 4.58 juta TEU (2019) dan begitu juga Pelabuhan Pulau Pinang mencatatkan peningkatan sebanyak 0.98% daripada 0.744 juta TEU kepada 0.737 juta TEU.

3. Bagi prestasi pengendalian kontena bagi separuh tahun yang pertama tahun 2020 (1H 2020) pula, Pelabuhan Klang dan Pelabuhan Pulau Pinang telah menunjukkan penurunan dibandingkan dengan tempoh yang sama pada tahun 2019. Sehingga Jun 2020, Pelabuhan Klang mencatatkan penurunan sebanyak 9.31%, manakala bagi Pelabuhan Pulau Pinang menunjukkan penurunan sebanyak 7.85%. Namun begitu, Pelabuhan Tanjung Pelepas telah menunjukkan petanda positif dengan pencapaian pengendalian kontena sebanyak 4.64 juta TEU setakat separuh tahun pertama tahun 2020 dengan mencatatkan peningkatan 1.28% berbanding tempoh yang sama pada tahun 2019.



4. Melihat kepada keadaan semasa dan trend aktiviti pengendalian kontena sehingga pertengahan tahun 2020, Pelabuhan Tanjung Pelepas telah merasionalisasikan semula sasaran (*forecast*) pengendalian kontena sebanyak 9.5 juta TEU sehingga akhir tahun 2020, diikuti Pelabuhan Klang sebanyak 11.4 juta TEU dan Pelabuhan Pulau Pinang sebanyak 1.6 juta TEU.

5. Sebagaimana sedia maklum, industri maritim juga terjejas akibat daripada kesan penularan pandemik Covid-19 termasuklah pelabuhan-pelabuhan yang mengalami permasalahan yang sama iaitu kesukaran untuk melaksanakan operasi pelabuhan sepertimana biasa akibat sekatan-sekatan yang perlu dikenakan oleh Kerajaan melalui pendekatan Perintah Kawalan Pergerakan (PKP) demi membendung penularan wabak Covid-19 dalam kalangan komuniti rakyat Malaysia.

6. Di sepanjang tempoh PKP, kebanyakan pelabuhan mengalami isu kesesakan pengendalian kargo/kontena di yad import berbanding di yad eksport yang berkemungkinan berpunca daripada penutupan kilang-kilang yang memproses barangan untuk tujuan eksport, manakala terdapat kilang-kilang yang diklasifikasikan sebagai pengeluar barangan bukan keperluan (*non-essential items*) tidak dibenarkan beroperasi tanpa kebenaran dalam tempoh awal pelaksanaan PKP. Hal ini sedikit sebanyak menjejaskan prestasi pengendalian kontena di pelabuhan-pelabuhan berkaitan.

7. Tambahan pula, kekurangan jumlah pengimportan dan pengeksportan kargo melalui kontena juga berkurangan disebabkan oleh negara-negara dunia yang juga mengambil pendekatan yang sama bagi menutup operasi perkilangan dan industri masing-masing bagi mengekang penularan wabak pandemik Covid-19 di kalangan rakyat masing-masing.

8. Sebagai langkah mengatasi isu kesesakan tersebut, Kementerian Pengangkutan telah pun melaksanakan empat (4) fasa pelepasan barangan kargo/kontena di pelabuhan-pelabuhan negara seperti berikut:

(a) Fasa Pertama : 27 hingga 29 Mac 2020

- (b) Fasa Kedua : 04 hingga 07 April 2020
- (c) Fasa Ketiga : 13 hingga 15 April 2020
- (d) Fasa Keempat : 20 hingga 24 April 2020

9. Secara keseluruhannya, pelaksanaan keempat-empat fasa pelepasan kontena dilihat telah memberikan kesan yang positif yang mana prestasi pengendalian kargo/kontena di pelabuhan-pelabuhan mula berada pada tahap yang baik dan terkawal. Sejak pelaksanaannya, kebanyakan pelabuhan juga dilihat telah kembali beroperasi sepertimana biasa sebagaimana keadaan sebelum PKP dikuatkuasakan.

10. Pelaksanaan keempat-empat fasa ini adalah mengikut Prosedur Operasi Standard (SOP) yang telah digariskan serta selari dengan Peraturan-Peraturan di bawah Akta Pencegahan dan Pengawalan Penyakit Berjangkit 1988 (Langkah-Langkah di dalam Kawasan Tempatan Jangkitan) (No. 2) 2020.

11. Dalam rancangan Kerajaan untuk merancakkan lagi industri logistik dan pelabuhan negara, Kementerian telah pun mempergiatkan usaha untuk mempertingkatkan/menggalakkan penggunaan automasi dalam pelabuhan, *internet of thing* dan digitalisasi khususnya dalam menghadapi situasi yang mencabar ketika ini. Salah satu inisiatif yang dilaksanakan baru-baru ini adalah penggunaan Sistem Pengesanan Kontena Kawalan Jauh (*Remote P-Check System*) yang dibangunkan oleh operator pelabuhan iaitu Westports Malaysia Sdn. Bhd. di Pelabuhan Barat yang membolehkan proses pengesanan kontena dilaksanakan dengan lebih pantas tanpa *human interaction*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN WONG CHEN [SUBANG]**  
**TARIKH : 26 OGOS 2020 (RABU)**

**SOALAN NO. 25**

**TUAN WONG CHEN [ SUBANG ]** minta **MENTERI KEWANGAN** menyatakan kesan ekonomi COVID-19 yang negatif, berikan perincian mengenai anggaran kekurangan pendapatan Kerajaan untuk tahun kewangan 2020.

**JAWAPAN**

Tuan Yang di-Pertua,

Semasa pembentangan Belanjawan 2020, Kerajaan telah mengumumkan unjuran jumlah hasil Kerajaan Persekutuan bagi tahun 2020 sebanyak RM244.5 bilion dengan andaian harga minyak mentah dunia Brent USD62 setong. Namun, krisis pandemik COVID-19 telah memberi impak yang besar kepada kedudukan kewangan Kerajaan Persekutuan. Berdasarkan situasi semasa, anggaran hasil dijangka mengalami pengurangan sekitar 18% berikutan unjuran Keluaran Dalam Negeri Kasar (KDNK) yang lebih rendah serta purata harga minyak mentah dunia Brent yang kekal rendah sekitar USD41 setong bagi tempoh Januari hingga 5 Ogos 2020.

Selain itu, Kerajaan turut melaksanakan pakej rangsangan dan pemulihan ekonomi susulan penularan pandemik COVID-19 serta inisiatif percukaian termasuk pengecualian cukai dan penangguhan bayaran cukai perniagaan dalam sektor pelancongan. Sehubungan itu, mengambil kira faktor di atas, kedudukan kewangan Kerajaan Persekutuan tahun 2020 dijangka mencatat defisit fiskal 5.8% hingga 6.0% berbanding 3.2% daripada KDNK. Perincian anggaran hasil Kerajaan Persekutuan tahun 2020 yang disemak semula akan dibentangkan bersekali dengan anggaran kedudukan kewangan tahun 2021 dalam Belanjawan 2021 yang dijadualkan pada 6 November 2020.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB PUAN NOORITA BINTI SUAL [ TENOM]**

**TARIKH : 26 OGOS 2020 (RABU)**

**SOALAN**

**PUAN NOORITA BINTI SUAL [ TENOM ]** minta **MENTERI KOMUNIKASI DAN MULTIMEDIA** menyatakan sejauh mana usaha Kementerian dalam memastikan kawasan-kawasan pedalaman khususnya di Sabah dilengkapi dengan liputan talian internet yang lebih baik, apakah status terkini 50 kawasan fasa pertama yang dikenal pasti di negeri Sabah dalam program *National Fiberisation and Connectivity Plan (NFCP)* yang telah dirancang oleh Kerajaan terdahulu.

**JAWAPAN**

Tuan Yang di-Pertua,

1. Untuk makluman Ahli Yang Berhormat, inisiatif untuk meningkatkan kualiti perkhidmatan merupakan satu usaha berterusan yang dilaksanakan oleh Kerajaan melalui Suruhanjaya Komunikasi dan Multimedia Malaysia (SKMM) dan Pemberi Perkhidmatan untuk membolehkan rakyat terutama di Sabah menikmati akses kepada perkhidmatan jalur lebar berkelajuan tinggi yang lebih menyeluruh.
2. Inisiatif penyediaan perkhidmatan liputan jalur lebar mudah alih yang telah dirancang sebelum ini di bawah Pelan Gentian Optik dan Kesalinghubungan Negara (NFCP) telah pun bermula sejak 15 Februari 2020, yang melibatkan sebanyak 50 tapak di negeri Sabah. Edotco Malaysia Sdn Bhd telah dianugerahkan untuk membina sebanyak 24 tapak struktur menara komunikasi manakala FGV Prodata Systems Sdn Bhd sebanyak 26 tapak.
3. Setelah menara-menara tersebut siap dibina, U Mobile Sdn Bhd pula akan bertanggungjawab untuk pemasangan alat pemancar komunikasi dan pemberian perkhidmatan mudah alih di kesemua 50 tapak tersebut. Di bawah inisiatif ini, para pengguna akan menikmati perkhidmatan 3G dan 4G. Kesemua menara komunikasi baharu ini dijangka siap dan beroperasi sepenuhnya secara berperingkat bermula suku pertama 2021.
4. Pada masa yang sama, SKMM juga membuat perancangan dengan pihak industri untuk memantapkan kualiti dan liputan perkhidmatan di seluruh negara menggunakan pelbagai teknologi

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN PRABAKARAN A/L M  
PARAMESWARAN [ BATU ]**

**TARIKH : 26 OGOS 2020 (RABU)**

**SOALAN**

Minta **MENTERI PENGAJIAN TINGGI** menyatakan mengapakah tindakan senarai hitam dikenakan ke atas pelajar yang dapat kelulusan penangguhan pembayaran pinjaman PTPTN kerana sedang melanjutkan pendidikannya.

**JAWAPAN**

Tuan Yang di-Pertua,

Seksyen 22A.(1), Akta Perbadanan Tabung Pendidikan Tinggi (Akta 566) memperuntukkan bahawa Ketua Pegawai Eksekutif, boleh mengemukakan penyata yang mempunyai nilai bayaran pinjaman tertunggak oleh pelajar dan permintaan kepada Ketua Polis Negara atau Ketua Pengarah Imigresen untuk menghalang seseorang pelajar keluar negara sekiranya belum menjelaskan baki tertunggak pinjaman PTPTN. Walau bagaimanapun, mana-mana peminjam yang telah diluluskan penangguhan bayaran balik pinjaman oleh PTPTN, nama mereka tidak akan disenaraihitamkan.

Untuk makluman Ahli Yang Berhormat juga, PTPTN tidak lagi melaksanakan dasar senarai hitam mulai Jun 2018, di mana kesemua 429,945 peminjam telah dikeluarkan daripada senarai hitam Jabatan Imigresen. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. PUAN ALICE LAU KIONG YIENG**  
**[LANANG]**  
**TARIKH : 26 OGOS 2020 (RABU)**

**SOALAN**

**PUAN ALICE LAU KIONG YIENG [ LANANG ]** minta **MENTERI KEWANGAN** menyatakan jumlah peruntukan Program Subsidi Upah 2020 dan apakah kelulusan dan pembayaran setiap bulan sehingga Jun 2020 untuk program tersebut serta adakah syarat-syarat kelayakan terlampau ketat menyebabkan banyak syarikat yang memerlukan bantuan gagal menerimanya.



**JAWAPAN**

Tuan Yang di-Pertua,

Keseluruhan Program Subsidi Upah (PSU) di bawah PRIHATIN dan PENJANA telah diperuntukkan sebanyak RM15.3 bilion dan pembayaran PSU mengikut bulan sehingga Jun 2020 adalah seperti berikut:

**Jadual Kumulatif kelulusan dan pembayaran PSU mengikut bulan**

<b>Bulan (Akhir Bulan)</b>	<b>Lulus Untuk Bayaran</b>		<b>Terima Bayaran</b>	
	<b>Bil. Majikan</b>	<b>Jumlah Subsidi (RM Billion)</b>	<b>Bil. Majikan</b>	<b>Jumlah Subsidi (RM Billion)</b>
April	235,658	1.932	117,093	1.188
Mei	287,029	3.886	282,722	3.511
Jun	309,655	7.144	309,449	6.713

Syarat-syarat PSU yang telah ditetapkan telah ditambahbaik dalam PENJANA untuk meningkatkan kadar penyertaan (*take-up rate*) majikan. Antaranya adalah untuk membenarkan majikan melaksanakan pengurangan waktu bekerja mingguan dan pengurangan gaji dengan persetujuan pekerja serta membenarkan pekerja menerima subsidi upah secara langsung bagi mereka yang mengambil cuti tanpa gaji dengan syarat pekerja menerima subsidi upah secara langsung (bagi sektor pelancongan dan sektor tersenarai dalam aktiviti terlarang sepanjang tempoh PKPB).

Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SERI DR. WAN AZIZAH WAN ISMAIL [ PANDAN ]**

**TARIKH : 26 OGOS 2020 (RABU)**

**SOALAN**

**DATO' SERI DR. WAN AZIZAH WAN ISMAIL [ PANDAN ]** minta **MENTERI PEMBANGUNAN WANITA, KELUARGA DAN MASYARAKAT** menyatakan status terkini bantuan USD150 juta untuk 3 tahun daripada Qatar Fund For Development (QFFD) untuk pelarian Rohingya di Malaysia, dan berapakah yang telah QFFD salurkan setakat 24 Februari 2020 dan senaraikan penerima-penerima sumbangan ini.

**JAWAPAN**

Tuan Yang di-Pertua,

Program Bantuan Kemanusiaan Pelarian di Malaysia Menggunakan Peruntukan Dana *Qatar Fund for Development* (QFFD) bernilai USD50 juta (bukan USD150 juta) merupakan sebuah projek kemanusiaan untuk pelarian di Malaysia bertujuan untuk menambah baik kebajikan dan kesejahteraan pelarian yang berdaftar dengan *United Nations High Commissioner for Refugees* (UNHCR) sepanjang keberadaan sementara mereka di negara ini. Mesyuarat Jemaah Menteri bertarikh 5 April 2019 telah bersetuju dengan pelantikan Yayasan Kebajikan Negara (YKN) sebagai badan penyelaras Program Bantuan Kemanusiaan ini.

Program QFFD telah dibahagikan kepada tiga (3) sektor iaitu sektor kesihatan, sektor pendidikan dan sektor kemandirian. Walau bagaimanapun, perjanjian bagi sektor kesihatan sahaja yang telah ditandatangani bagi tahun pertama iaitu bermula 17 September 2019 dengan kos keseluruhan berjumlah USD5.7 juta setahun. Sektor kesihatan ini bertujuan meningkatkan akses kepada pelarian Rohingnya untuk mendapatkan perkhidmatan kesihatan primer dan sekunder selain meningkatkan kesedaran mengenai pendidikan kesihatan.

Bagi pelaksanaan program sektor kesihatan ini, sebanyak tiga (3) buah Pertubuhan Bukan Kerajaan (NGO) Malaysia telah dilantik oleh QFFD sebagai rakan pelaksana iaitu MERCY Malaysia, *IMAM Response and Relief Team* (IMARET) dan *Malaysia Relief Agency* (MRA). Pelantikan tiga (3) NGO ini adalah berdasarkan pengalaman, kepakaran dan kredibiliti NGO terbabit dalam melaksanakan kerja-kerja kebajikan. Manakala YKN telah dilantik oleh Kerajaan melalui Mesyuarat *High Level Committee* (HLC) pada 1 Mac 2019 untuk menjadi koordinator pelaksanaan Program bagi menyelaraskan keperluan NGO-NGO ini dengan agensi kerajaan, Kementerian yang berkaitan dan lain-lain apabila diperlukan.

Penyaluran dana bagi projek ini dilaksanakan kepada NGO yang terlibat secara berperingkat oleh Qatar Charity (QC) yang merupakan NGO tempatan Qatar dan dilantik oleh QFFD yang beroperasi di Malaysia berdasarkan kepada status siap *deliverable* projek.

Sehingga 24 Februari 2020, sebanyak USD840 ribu bersamaan RM3.45 juta telah disalurkan oleh QFFD bagi tujuan pengubahsuaian dan kos operasi klinik. Bagi pelaksanaan program di bawah sektor pendidikan dan kemandirian, skop dan rangka kerja yang telah dicadangkan masih belum mendapat keputusan rasmi daripada pihak QFFD.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. DR. ONG KIAN MING [BANGI]**  
**TARIKH : 26 OGOS 2020 (RABU)**

**SOALAN**

**DR. ONG KIAN MING [ BANGI ]** minta **MENTERI KEWANGAN** menyatakan jumlah hutang terkini Pembinaan PFI Sdn Bhd. (Nombor Syarikat 748841-V) dan adakah Kerajaan merancang untuk terus membiayai Perbelanjaan Pembangunan dengan menggunakan syarikat serupa untuk Belanjawan 2020 dan 2021.

**JAWAPAN**

Tuan Yang di-Pertua,

Untuk makluman Ahli Yang Berhormat, Pembinaan PFI Sdn Bhd (PPFI) adalah sebuah syarikat tujuan khas (dengan izin *Special Purpose Vehicle* atau SPV) milik penuh Menteri Kewangan Diperbadankan (MKD) yang ditubuhkan pada 28 September 2006. Penubuhan syarikat ini bertujuan untuk mendapatkan pembiayaan bagi membiayai projek dan program pembangunan yang dikenalpasti oleh Kerajaan sejak Rancangan Malaysia Ke-9 (RMK-9).

Perolehan dana melalui PPFI berkenaan adalah bagi mempercepatkan pelaksanaan projek pembangunan Kerajaan, terutamanya projek infrastruktur seperti sekolah, universiti, hospital, penjara dan sebagainya, memandangkan peruntukan di bawah Belanja Pembangunan adalah terhad. Untuk makluman Ahli Yang Berhormat juga,

jumlah hutang PPFI sehingga **30 Jun 2020** bagi membiayai projek dan program pembangunan yang telah dikenalpasti adalah berjumlah RM29.68 bilion.

Tuan Yang di-Pertua,

Untuk makluman Ahli Yang Berhormat, pembiayaan bagi pelaksanaan projek dan program pembangunan Kerajaan Persekutuan adalah menggunakan dana daripada Kumpulan Wang Pembangunan (KWP). Sumber utama KWP adalah daripada pinjaman Kerajaan Persekutuan dan juga pindahan lebihan hasil daripada Kumpulan Wang Hasil Disatukan ke KWP. KWP tidak menerima dana daripada Syarikat Pembinaan PFI untuk membiayai Perbelanjaan Pembangunan. Sebaliknya, dana yang diperolehi daripada Syarikat SPV ini disalurkan ke dalam Akaun Amanah PFI bagi membiayai projek yang dibiayai di bawah PFI. Pembayaran balik pinjaman yang dibuat oleh Syarikat SPV tersebut diperuntukkan di bawah Anggaran Perbelanjaan Tahunan Kerajaan bagi tahun 2020 dan tahun 2021.

Untuk makluman Yang Berhormat juga, keputusan untuk memperuntukkan pembayaran balik pinjaman PFI ini telah dipersetujui oleh Jemaah Menteri pada 15 Mac 2019. Setakat ini, Kementerian Kewangan tidak bercadang untuk menambah pembiayaan projek pembangunan melalui kaedah menggunakan syarikat Pembinaan PFI atau seumpamanya pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN CHONG CHIENG JEN [STAMPIN]**  
**TARIKH : 26 OGOS 2020 (RABU)**

**SOALAN**

**TUAN CHONG CHIENG JEN [ STAMPIN ]** minta **MENTERI KEWANGAN** menyatakan baki tunggakan bayaran balik GST setakat akhir Jun 2020 dan jumlah syarikat yang terlibat. Adakah Kerajaan mempertimbangkan pelaksanaan semula sistem GST.

**JAWAPAN**

Tuan Yang di-Pertua,

Berdasarkan maklumat Jabatan Kastam Diraja Malaysia, tunggakan baki tuntutan bayaran balik (atau *refund*) GST sehingga 30 Jun 2020 adalah sebanyak RM5.167 billion. Jumlah registran yang terlibat adalah seramai 70,442. Walau bagaimanapun, selaras dengan pengumuman oleh Kerajaan pada 15 Jun 2020, sejumlah **RM1.479 billion** telah diluluskan untuk pembayaran bagi tempoh 22 Jun 2020 sehingga 8 Julai 2020. Baki tuntutan bayaran balik GST yang belum dibayar sehingga 8 Julai 2020 adalah sebanyak **RM4.763 billion**. Kesemua bayaran ini dijangka dibuat selewat-lewatnya sebelum akhir tahun ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN MA'MUN BIN SULAIMAN  
[ KALABAKAN ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan agar membuat kajian menyeluruh kepada keperluan membina sekolah menengah baharu yang lengkap dengan asrama dan rumah guru untuk menggantikan bangunan bangunan usang dan daif SMK Kalabakan yang mempunyai tidak kurang dari 700 murid tempatan luar bandar di mana anak-anak kecil seawal darjah satu di kawasan perladangan Benta Wawasan SIB, terpaksa melalui perjalanan jauh ke sekolah-sekolah terdekat di SK FELDA Umas dan SK Luasong.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa prihatin dan terus memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik, untuk semua sekolah di seluruh negara. Ini adalah penting untuk memastikan pengajaran dan pembelajaran dilaksanakan dalam keadaan selamat di sekolah.

KPM juga sentiasa memantau keadaan fasiliti bangunan dan kemudahan sekolah, melalui Jabatan Pendidikan Negeri (JPN) dan Pejabat Pendidikan Daerah (PPD). Dalam hal ini, KPM mempunyai maklumat perincian mengenai fizikal komponen atau fasiliti bangunan di sekolah yang tidak sempurna, tidak berfungsi dan tidak selamat.

Mulai tahun 2019, KPM melaksanakan analisis skor gred impak sebagai penambahbaikan bagi menentukan tahap keadaan fizikal komponen atau fasiliti bangunan sekolah daif. Skor ini mempunyai 7 tahap, di mana tahap 6 adalah bangunan yang tidak selamat dengan pengesahan daripada JPN dan PPD. Manakala, tahap 7 adalah bangunan yang tidak selamat dengan pengesahan daripada Jabatan Kerja Raya (JKR). Melalui penilaian ini, KPM dapat menentukan keutamaan untuk melaksanakan projek pembangunan semula atau menaik taraf bangunan sekolah yang tidak selamat digunakan.

Antara langkah yang diambil oleh KPM bagi menangani isu bangunan daif di sekolah adalah melakukan penyelenggaraan bagi bangunan sekolah yang masih boleh diperbaiki iaitu yang berada di skala 6, manakala bangunan yang telah disahkan tidak selamat oleh JKR yang berada di skala 7 akan dirancang dalam Rancangan Malaysia 5 tahun untuk pembangunan semula.

Untuk makluman Ahli Yang Berhormat, SMK Kalabakan adalah sekolah kerajaan yang mempunyai blok bangunan akademik daif berskala 6 dengan pengesahan daripada JPN. Pada masa ini, cadangan gantian bangunan daif di SMK Kalabakan masih dalam peringkat



penilaian oleh Jabatan Pendidikan Negeri (JPN) Sabah dan tindakan seterusnya adalah bagi mendapatkan pengesahan teknikal daripada Jabatan Kerja Raya. Perkara yang perlu diselesaikan juga oleh KPM adalah berkaitan status tanah SMK Kalabakan yang masih merupakan hak milik Kerajaan Negeri.

Oleh demikian, status pemilikan tanah tersebut perlu ditukar terlebih dahulu kepada Pesuruhjaya Tanah Persekutuan bagi membolehkan cadangan projek gantian bangunan SMK Kalabakan dibiayai melalui peruntukan pembangunan Persekutuan.

KPM akan mengadakan sesi libat urus dengan Kerajaan Negeri Sabah bagi menyelesaikan status tanah SMK Kalabakan pada pertengahan September 2020. Setelah perkara tersebut diselesaikan, KPM akan mengemukakan permohonan pembangunan fizikal sekolah ini kepada Agensi Pusat untuk dipertimbangkan dalam Rancangan Malaysia Ke-12, tertakluk kepada kedudukan kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN LIM GUAN ENG [BAGAN]**  
**TARIKH : 26 OGOS 2020 (RABU)**

**SOALAN**

**TUAN LIM GUAN ENG [ BAGAN ]** minta **MENTERI KEWANGAN** menyatakan jumlah pinjaman yang dikeluarkan oleh sektor perbankan dan sama ada kadar peratusan yang menurun ini akan menyukarkan lagi ekonomi dan perniagaan untuk pulih semula. Nyatakan prestasi pengeluaran bantuan dan pinjaman yang diumumkan oleh Kerajaan kepada perniagaan.

**JAWAPAN**

Tuan Yang di-Pertua,

1. Untuk makluman Ahli Yang Berhormat, pada bulan Mei 2020, pertumbuhan pinjaman terkumpul secara keseluruhan kekal pada 3.9% (Disember 2019: 3.9%), disokong oleh pertumbuhan pinjaman perniagaan terkumpul (Mei 2020: 4.5%, Disember 2019: 3.3%) yang didorong oleh permohonan pinjaman untuk modal kerja yang lebih tinggi. Sementara itu, pertumbuhan pinjaman isi rumah terkumpul menjadi sederhana (Mei 2020: 3.2%, Disember 2019: 4.7%) berikutan permintaan terhadap pinjaman isi rumah yang lebih rendah, terutamanya untuk pinjaman perumahan, berikutan tamatnya Kempen Pemilikan Rumah pada tahun 2019, dan pelaksanaan Perintah Kawalan Pergerakan (PKP) pada pertengahan bulan Mac.

2. Paras pengeluaran pinjaman kekal lemah bagi kebanyakan sektor perniagaan dan semua tujuan pinjaman isi rumah, disebabkan oleh permohonan yang berkurangan semasa fasa PKP. Walau bagaimanapun, perniagaan dan isi rumah yang berdaya maju masih mempunyai akses kepada pembiayaan, dengan kadar kelulusan bagi perniagaan dan isi rumah pada amnya kekal stabil dengan kadar yang menjurus kepada purata lima tahunnya.

3. Bagi Perusahaan Kecil dan Sederhana (PKS) khususnya, pembiayaan yang diluluskan oleh institusi kewangan daripada bulan Januari 2020 hingga bulan Mei 2020 berjumlah RM26.4 bilion kepada 51,500 PKS (Januari – Mei 2019: RM28.5bil; 48,700 PKS). Walaupun kelulusan mengikut jumlah menurun sebanyak 7.2%, kelulusan mengikut bilangan akaun meningkat sebanyak 5.8%. Ini mencerminkan peningkatan kelulusan pembiayaan dengan jumlah pembiayaan (*ticket size*) yang lebih kecil bagi setiap PKS.

4. Sektor perbankan terus komited dalam usaha membantu PKS. Bagi tempoh yang sama, sejumlah RM97.4 bilion telah dikeluarkan (*disbursed*) kepada PKS. Namun begitu, usaha ini harus diseimbangkan dengan tanggungjawab fidusiari institusi kewangan untuk memastikan deposit daripada orang ramai adalah terpelihara pada setiap masa. Sebarang pinjaman yang dibuat menggunakan dana pendeposit perlu dilakukan secara berhemat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 26 OGOS 2020 (RABU)**

**SOALAN**

**Minta MENTERI PENDIDIKAN** menyatakan mekanisme yang akan diambil kepada sekolah bantuan modal yang masih serba kekurangan dalam pelbagai aspek khususnya yang melibatkan infrastruktur dan kelengkapan sekolah.

**JAWAPAN**

Tuan Yang di-Pertua,

Berdasarkan Akta Pendidikan 1996 [Akta 550], sekolah bantuan kerajaan (SBK) atau institusi pendidikan bantuan ertinya sekolah atau institusi pendidikan yang menerima sumbangan bantuan modal dan sumbangan bantuan penuh daripada Kerajaan. Dengan ini, sekolah bantuan modal juga termasuk dalam kategori SBK.

Untuk makluman Ahli Yang Berhormat, KPM tidak menyediakan sebarang peruntukan bagi pembinaan bangunan di sekolah bantuan kerajaan, termasuk infrastruktur dan kelengkapan sekolah. Kos tersebut hendaklah dibiayai oleh Lembaga Pengelola Sekolah (LPS) berkenaan. LPS perlu bertanggungjawab menyediakan kemudahan infrastruktur dan kemudahan fizikal untuk keselesaan seluruh warga sekolah tersebut.

Walau bagaimanapun, KPM ada menyediakan peruntukan mengurus kepada SBK. Peruntukan ini adalah bagi membiayai bayaran emolumen dan elaun guru, utiliti, kawalan keselamatan dan pembersihan kawasan, peralatan pengajaran dan pembelajaran serta pemberian bantuan geran perkapita (PCG). Selain itu, KPM turut menyediakan peruntukan pembayaran bil utiliti berdasarkan bil sebenar dengan had maksimum RM5,000.00 untuk setiap SBK.

Bagi tahun 2020, KPM sedang menyalurkan peruntukan sebanyak RM136.8 juta di bawah Program Khusus Penyelenggaraan Institusi Pendidikan kepada Sekolah Jenis Kebangsaan Cina (SJKC), Sekolah Jenis Kebangsaan Tamil (SJKT), Sekolah Agama Bantuan Kerajaan (SABK) dan Sekolah Mubaligh yang berstatus SBK. Peruntukan ini hanya boleh digunakan untuk penyelenggaraan aset tak alih mengikut Pekeliling Am Bilangan 2 Tahun 2012 - Tatacara Pengurusan Aset Tak Alih Kerajaan. Berdasarkan tatacara sedia ada, peruntukan tersebut tidak boleh digunakan untuk pembelian perkakasan, peralatan, perabot, pembinaan bangunan baharu, pembayaran sewa, pembayaran kos utiliti dan sebagainya yang tidak berkaitan dengan penyelenggaraan aset tak alih. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM TZE TZIN [BAYAN BARU]**

**TARIKH : 26 OGOS 2020 (RABU)**

**SOALAN**

Minta **MENTERI PERTANIAN DAN INDUSTRI MAKANAN** menyatakan masalah pembuangan hasil pertanian seperti sayur-sayuran, buah-buahan dan ikan semasa PKP. Apakah langkah yang diambil oleh Kementerian selepas media melaporkan peristiwa-peristiwa tersebut. Berapa jumlah pembelian oleh FAMA dan LKIM untuk membantu menyelesaikan masalah lambakan tersebut.

**JAWAPAN**

**Yang Dipertua,**

1. Pada awal fasa Perintah Kawalan Pergerakan (PKP), aktiviti pengedaran hasil sayur-sayuran dan buah-buahan agak terjejas disebabkan oleh sekatan perjalanan dan penutupan beberapa premis pemborongan, peruncitan dan sektor hotel, restoran dan katering. Ini menyebabkan berlakunya beberapa kes lambakan hasil pertanian apabila hasil tanaman tidak dapat dibawa ke pasaran atau ke pusat pemprosesan pada masanya. Bagi komoditi ikan pula, tiada isu lambakan bagi ikan makan kecuali ikan proses disebabkan masalah pemberhentian operasi oleh syarikat pembeli ikan proses semasa Perintah Kawalan Pergerakan (PKP). Masalah ini telah selesai setelah syarikat yang terlibat beroperasi semula setelah mendapat kebenaran khas pengoperasian dalam tempoh PKP oleh Kementerian Perdagangan Antarabangsa dan Industri (MITI).

2. Untuk mengatasi masalah lambakan, FAMA telah membantu memasarkan hasil keluaran pertanian dengan membuat belian secara terus daripada petani serta mengaturkan pasaran. Sebagai contoh, FAMA telah membuat belian sebanyak 102 metrik tan dengan nilai belian sebanyak RM287,077 daripada petani sayur-sayuran di Cameron Highland yang terjejas pasaran eksport ke Singapura. Secara keseluruhan, bagi tempoh 18 Mac hingga 7 Julai 2020, FAMA telah membeli sebanyak 7,670 metrik tan hasil pertanian yang dianggarkan bernilai RM11.25 juta. Pembelian ini telah memberi manfaat kepada 2,350 petani.

3. Dalam masa yang sama, FAMA juga memasarkan hasil pertanian secara *offline* dan *online* bagi merancakkan aktiviti pengedaran dan pemasaran produk pertanian. Antara inisiatif yang telah dilaksanakan adalah pembukaan Pasar Segar Terkawal, pengedaran hasil pertanian ke pasaraya, kolaborasi bersama usahawan peruncitan FAMA serta jualan di platform Agrobazaar Online (ABO) dan kedai maya Agrobazaar Malaysia di Shopee. Secara keseluruhan, nilai jualan yang dicapai adalah berjumlah RM355.08 juta. Seramai 3.39 juta pengguna dan 2,271 orang usahawan dianggarkan telah mendapat manfaat daripada pelbagai strategi pemasaran semasa pandemik COVID-19 berlaku.

4. Bagi komoditi ikan pula, LKIM telah menyediakan beberapa saluran pemasaran seperti Pasar Nelayan Terkawal, jualan secara *Cash On Delivery* (COD) oleh 44 Persatuan Nelayan (PN), jualan ikan melalui platform online Shopee dan nekmabiz.com.my, jualan menggunakan *runner* atau ejen penghantaran dan jualan di 25 buah Pusat Pengumpulan dan Pengedaran Ikan (CCDC) Air Tawar. Secara keseluruhan, nilai transaksi yang dicatatkan adalah berjumlah RM 25 juta.

5. Selain itu, LKIM juga telah melaksanakan beberapa inisiatif bagi menggalakkan aktiviti pemasaran ikan seperti pemberian insentif Bantuan Modal Pusingan kepada Persatuan Nelayan bagi pembelian stok ikan dan pemasaran ikan serta pemberian Dana Khas Pertubuhan Nelayan Kawasan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : Y.B. TUAN WONG KAH WHO [IPOH TIMUR]**

**TARIKH : 26 OGOS 2020 (RABU)**

**SOALAN**

**TUAN WONG KAH WOH [ IPOH TIMUR ]** minta **MENTERI KEWANGAN** menyatakan sama ada mempunyai rancangan untuk menambah peruntukan Program Subsidi Upah khas untuk sektor-sektor yang tidak dapat pulih akibat daripada PKP yang dilaksanakan, seperti sektor pelancongan, hotel dan syarikat-syarikat pengurusan event (*event management company*).

**JAWAPAN**

Tuan Yang di-Pertua,

Keseluruhan Program Subsidi Upah (PSU) di bawah PRIHATIN dan PENJANA telah diperuntukkan sebanyak RM15.3 bilion dan setakat 14 Ogos 2020, program ini telah berjaya membantu sebanyak lebih daripada 320 ribu majikan untuk mengekalkan seramai 2.6 juta pekerja dalam pelbagai industri termasuk pelancongan, perhotelan dan pengurusan acara.

Untuk makluman, PSU telah ditambahbaik di bawah PENJANA yang diumumkan pada 5 Jun untuk meluaskan lagi kadar penyertaan (*take-up rate*) majikan dan membantu lebih ramai pekerja. Antaranya adalah untuk membenarkan majikan melaksanakan pengurangan waktu bekerja mingguan dan pengurangan gaji dengan persetujuan pekerja, serta



membenarkan pekerja menerima subsidi upah secara langsung bagi mereka yang mengambil cuti tanpa gaji dengan syarat pekerja menerima subsidi upah secara langsung bagi sektor pelancongan dan sektor tersenarai dalam aktiviti terlarang sepanjang tempoh PKP.

Pada masa ini, Kerajaan juga telah pun memperkenalkan pelbagai inisiatif selain daripada PSU untuk membantu golongan pekerja dan majikan yang sedang menghadapi kesukaran akibat penularan wabak COVID-19. Antara inisiatif yang dilaksanakan adalah seperti moratorium bayaran balik pinjaman, moratorium lanjutan dan bantuan bank bersasar, diskaun bil elektrik, program pengekalan pekerjaan, pelbagai jenis dana pembiayaan bagi perusahaan mikro, kecil dan sederhana, dan insentif pengambilan pekerja dan latihan-latihan kemahiran.

Kerajaan sentiasa memantau pelaksanaan inisiatif-inisiatif dan terbuka untuk mempertimbangkan penambahbaikan PSU tertakluk kepada penilaian keberkesanan secara menyeluruh program-program bantuan kepada pekerja dan majikan serta kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN LIM GUAN ENG [BAGAN]**  
**TARIKH : 26 OGOS 2020 (RABU)**

**SOALAN**

**TUAN LIM GUAN ENG [ BAGAN ]** minta **MENTERI KEWANGAN** menyatakan unjuran pertumbuhan ekonomi, kadar pengangguran dan kes kebangkrutan tahun ini memandangkan anggaran Bank Dunia bahawa pertumbuhan GDP Malaysia akan susut 3.1% serta langkah yang diambil untuk menghindari keadaan sedemikian, khususnya di kalangan peniaga-peniaga kecil dan pekerja yang kehilangan pekerjaan.

**JAWAPAN**

**Tuan Yang di-Pertua,**

1. Prospek ekonomi Malaysia bagi tahun ini dijangka terjejas akibat pandemik COVID-19 dan ini dapat dilihat melalui penyusutan KDNK negara bagi suku kedua 2020 kepada 17.1 peratus seterusnya menjadikan pertumbuhan dalam tempoh separuh tahun pertama 2020 merekodkan kemerosotan sebanyak 8.3 peratus. Justeru, unjuran KDNK negara bagi tahun 2020 telah disemak semula kepada antara -3.5 peratus hingga -5.5 peratus. Penguncupan pertumbuhan pada suku kedua tahun ini juga dialami oleh negara lain. Akibat krisis kesihatan yang disebabkan oleh pandemik COVID-19, Dana Kewangan Dunia (IMF) telah mengunjurkan bahawa lebih daripada 150 negara akan mencatat penguncupan kadar pertumbuhan KDNK pada tahun ini.

2. Ekonomi Malaysia mengalami penguncupan signifikan susulan pelaksanaan Perintah Kawalan Pergerakan (PKP) bagi mengawal

penularan COVID-19 yang mengakibatkan hampir keseluruhan sektor perniagaan tidak dapat beroperasi. Walau bagaimanapun, pertumbuhan ekonomi mula menunjukkan penambahbaikan seperti yang ditunjukkan oleh pertumbuhan KDNK bulanan dari -28.6% pada bulan April kepada -19.5% pada bulan Mei dan seterusnya ke -3.2% pada bulan Jun. Angka KDNK pada bulan Jun 2020 jelas menunjukkan pemantulan pertumbuhan ekonomi yang kukuh sejajar dengan pembukaan dan pelaksanaan PKP Pemulihan (PKPP).

**Tuan Yang di-Pertua,**

3. Penutupan operasi bagi sebahagian besar perniagaan semasa PKP yang dilanjutkan sehingga April 2020 telah menyebabkan kehilangan banyak pekerjaan dan kesukaran untuk mendapatkan pekerjaan baharu. Walau bagaimanapun, pasaran buruh dijangka mulai pulih dalam tempoh separuh kedua tahun ini berikutan langkah Kerajaan melaksanakan PKPP yang membolehkan operasi perniagaan dibuka sepenuhnya mulai 10 Jun 2020. Berdasarkan statistik terkini pada Jun 2020, kadar pengangguran telah menurun kepada 4.9 peratus dari paras tertinggi 5.3 peratus pada Mei 2020.

4. Bagi tahun 2020, jumlah keseluruhan kes kebangkrapan yang berdaftar sehingga bulan Jun adalah sebanyak 3,232 individu dan jumlah ini boleh dianggap satu penurunan yang ketara berbanding 12,051 individu bagi keseluruhan tahun 2019.

**Tuan Yang di-Pertua,**

5. Mengambil kira akan kesulitan yang dihadapi oleh peminjam yang kini berdepan dengan cabaran pandemik COVID-19, di bawah pakej PRIHATIN dan PENJANA, Kerajaan telah memberi penangguhan pembayaran balik pinjaman (moratorium) secara automatik selama enam bulan sehingga September 2020 untuk membantu para peminjam individu dan perusahaan kecil dan sederhana (PKS) mendapat bantuan aliran tunai segera terutamanya ketika pelaksanaan PKP yang telah merencatkan kegiatan ekonomi. Tambahan lagi, Kerajaan telah bersetuju moratorium

lanjutan dan bantuan bank bersasar yang lebih berfokus khusus untuk golongan yang benar-benar memerlukan. Ini adalah bagi memastikan supaya peminjam yang kehilangan punca pendapatan dan gagal membayar ansuran bulanan, tidak diisytiharkan bankrap. Di samping itu, golongan B40 dan M40 yang layak juga mendapat Bantuan Prihatin Nasional dan Bantuan Sara Hidup serta dapat menikmati program diskaun elektrik yang bermatlamat untuk mengurangkan beban aliran tunai.

6. Tambahan lagi, pelbagai langkah telah dilaksanakan oleh Kerajaan terutamanya dalam membantu PKS yang menghadapi kekangan aliran tunai disebabkan pandemik COVID-19. Antara inisiatif pelan jangka pendek yang telah diumumkan termasuklah:

- a. Program Subsidi Upah bagi membantu majikan mengekalkan pekerja daripada dibuang dan hilang pendapatan;
- b. Pemberian Geran Khas PRIHATIN sebanyak RM3,000 untuk setiap PKS mikro bagi menampung keperluan aliran tunai perniagaan yang terjejas; dan
- c. Penyediaan Kemudahan Bantuan Khas (*Special Relief Facility*, SRF) dengan peruntukan akhir berjumlah RM10 bilion khusus untuk membantu PKS yang terkesan akibat daripada pandemik COVID-19;
- d. Pemberian bantuan aliran tunai syarikat melalui program Khidmat Rundingan Majikan, pengecualian pembayaran levi Tabung Pembangunan Sumber Manusia (HRDF) dan membenarkan penangguhan pembayaran cukai pendapatan PKS;
- e. Penyediaan Skim Pembiayaan Pelancongan PENJANA bernilai RM1 bilion yang mana ianya bertujuan membantu PKS dalam sektor pelancongan meningkatkan keupayaan untuk kekal berdaya maju; dan

- f. Pewujudan Pembiayaan Mikro PENJANA dengan kerjasama Bank Simpanan Nasional dan TEKUN Nasional bagi membantu perusahaan mikro.

**Tuan Yang di-Pertua,**

7. Melangkah ke hadapan, Kerajaan akan terus memperkemas dan melaksanakan pelbagai inisiatif untuk meringankan beban rakyat, menyokong perniagaan dan memulihkan ekonomi melalui Belanjawan 2021 yang akan dibentangkan pada bulan November 2020. Kerajaan sentiasa komited untuk memperteguh asas ekonomi negara, memulihkan keyakinan rakyat dan pelabur termasuk memperkukuh pengurusan fiskal dan mempelbagaikan sumber pendapatan negara demi memacu pertumbuhan ekonomi masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN WONG CHEN [SUBANG]**  
**TARIKH : 26 OGOS 2020 (RABU)**

**SOALAN NO. 39**

**TUAN WONG CHEN [ SUBANG ]** minta **MENTERI KEWANGAN** menyatakan:-

- (a) berapa banyak perbelanjaan yang telah dibelanjakan oleh Kerajaan untuk menangani COVID-19 sehingga 31 Jun 2020 ; dan
- (b) memberikan perincian perbelanjaan.

**JAWAPAN**

Tuan Yang di-Pertua,

Untuk makluman Yang Berhormat, dalam menangani penularan wabak COVID-19 secara langsung, sehingga 14 Ogos 2020, Kerajaan telah membelanjakan lebih RM995 juta bagi membiayai pelbagai usaha yang dilaksanakan oleh Kementerian dan agensi terlibat. Antara perbelanjaan besar adalah bagi perkara berikut:

- i. Sebanyak RM512.5 juta telah dibelanjakan daripada peruntukan RM1 bilion yang sediakan kepada Kementerian Kesihatan untuk perolehan barangan seperti *personal protective equipment* (PPE), *test kit*, reagen, aset untuk ujian virus isolasi dan PCR-nCOV, thermal scanner, perkhidmatan penghantaran sample dan penggajian 2,000 kakitangan kontrak tambahan;
- ii. Sebanyak RM222.4 juta dibelanjakan untuk elaun khas kepada barisan hadapan yang sedang menangani wabak COVID19 dan melaksanakan tugas dalam tempoh Perintah Kawalan Pergerakan (PKP);
- iii. Sebanyak RM130 juta telah disalurkan kepada Kerajaan-kerajaan Negeri bagi membantu pengurus penularan wabak COVID 19;
- iv. Sebanyak RM100 juta disediakan kepada pihak Agensi Pengurusan Bencana Negara (NADMA) bagi perbelanjaan-perbelanjaan berkaitan pengurusan wabak COVID 19 termasuk pengurusan pusat-pusat kuarantin seluruh negara, pengwujudan dan kos operasi hospital sementara Covid-19 MAEPS, makan dan minum pelajar institut pengajian tinggi awam dan perolehan pelitup muka serta PPE; dan
- v. Sebanyak RM30 juta dibelanjakan oleh Kementerian Perumahan dan Kerajaan Tempatan bagi program sanitasi di kawasan-kawasan zon merah dan pusat-pusat kuarantin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN TEO NIE CHING [ KULAI ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan unjuran dan pengambilan IPG 2020 untuk Sekolah Kebangsaan, SJKC dan SJKT mengikut mata pelajaran.

**JAWAPAN**

Tuan Yang di-Pertua,

Institut Pendidikan Guru (IPG) merupakan sebuah institusi latihan di bawah Kementerian Pendidikan Malaysia (KPM) yang melatih guru untuk memenuhi keperluan sekolah rendah bantuan Kerajaan dengan menawarkan Program Ijazah Sarjana Muda Perguruan (PISMP). PISMP menawarkan 21 bidang pengkhususan yang dikelompokkan kepada empat bidang utama iaitu Bahasa, Sains dan Matematik, Sains Sosial dan Kemasyarakatan, Teknik Vokasional. Di samping itu, IPG juga menawarkan tiga tambahan bidang, iaitu Pendidikan Awal Kanak-Kanak, Bimbingan dan Kaunseling serta Pendidikan Khas.

Untuk makluman Ahli Yang Berhormat, jumlah pengambilan guru pelatih adalah berdasarkan unjuran keperluan guru yang telah ditetapkan oleh KPM. Bagi tahun 2020, unjuran keperluan guru adalah seramai 6,000 orang. Daripada jumlah tersebut, 2,840 orang untuk Sekolah Kebangsaan (SK), 1,220 orang untuk Sekolah Jenis Kebangsaan Cina (SJKC), 470 orang untuk Sekolah Jenis Kebangsaan Tamil (SJKT) dan



**NO. SOALAN : 40**

1,470 orang untuk Pendidikan Islam. Perincian unjuran dan penawaran mengikut bidang pengkhususan seperti berikut:

Bil	Bidang	SK		SJKC		SJKT	
		Unjuran	Tawaran	Unjuran	Tawaran	Unjuran	Tawaran
1.	Bahasa Melayu	580	592	500	499	210	200
2.	Pengajian Bahasa Inggeris Sebagai Bahasa Kedua	800,	801	90	89	30	31
3.	Bahasa Iban	50	51	-	-	-	-
4.	Bahasa Kadazan Dusun	50	34	-	-	-	-
5.	Matematik	-	-	30	29	30	9
6.	Sains	-	-	30	30	30	4
7.	Sejarah	200	200	30	26	-	-
8.	Reka Bentuk dan Teknologi	430	433	120	26	60	18
9.	Pendidikan Seni Visual	90	91	100	26	20	12
10.	Pendidikan Muzik	-	-	60	22	30	19
11.	Pendidikan Jasmani	300	302	150	13	60	29
12.	Pendidikan Awal Kanak-Kanak	30	30	-	-	-	-
13.	Pendidikan Khas- Masalah Pembelajaran	100	100	15	9	-	-
14.	Pendidikan Khas- Masalah Pendengaran	40	39	5	5	-	-
15.	Pendidikan Khas- Masalah Penglihatan	20	18	-	-	-	-
16.	Bimbingan & Kaunseling	150	151	90	91	-	-
17.	Pendidikan Islam (umum)	1,470	1,472	-	-	-	-

Sekian, terima kasih

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATUK SERI SHAMSUL ISKANDAR @ YUSRE  
BIN MOHD AKIN [ HANG TUAH JAYA ]**

**TARIKH : 26 OGOS 2020 (RABU)**

**SOALAN**

**DATUK SERI SHAMSUL ISKANDAR @ YUSRE BIN MOHD AKIN [ HANG TUAH JAYA ]** minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah penerima bakul makanan (food basket), nilai setiap bakul dan jumlah peruntukan yang telah dibelanjakan untuk bakul makanan di dalam Parlimen Hang Tuah Jaya sepanjang Tempoh Kawalan Pergerakan; bagaimana edaran dilaksanakan dan apakah Kementerian tidak mengiktiraf peranan Ahli Parlimen di dalam menyalurkan bantuan kepada rakyat.

**JAWAPAN**

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah menyediakan bantuan kewangan kebajikan kepada kumpulan sasar yang memerlukan bagi meneruskan kelangsungan hidup. Bantuan yang dipertimbangkan kepada rakyat Malaysia berdasarkan syarat kelayakan yang telah ditetapkan.

Jumlah penerima bantuan bakul makanan di Kawasan Parlimen Hang Tuah Jaya adalah sebanyak 750 bakul makanan iaitu RM 750,000. Senarai

**SOALAN NO. : 41**

barangan keperluan bagi bakul makanan dengan kadar RM100 adalah seperti berikut:

<b>BIL.</b>	<b>ITEM</b>	<b>KUANTITI</b>
1	Beras 10kg	1 beg
2	Minyak masak 2kg*	1 botol
3	Gula pasir 1kg	2 paket
4	Tepung gandum 850gm	2 paket
5	Susu pekat 500gm	2 tin
6	Garam halus 400gm	2 paket
7	Bihun 400gm	2 paket
8	Kicap 660ml*	1 botol
9	Sos cili 340g	1 botol
10	Sardin 425g	2 tin
11	Teh/kopi	1 paket
12	Biskut	1 paket
13	Rempah ratus	
14	Cili kering	
15	Ikan kering/ bilis	

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SYED SADDIQ BIN SYED ABDUL  
RAHMAN [ MUAR ]**

**TARIKH : 26 OGOS 2020 (RABU)**

**SOALAN**

minta **MENTERI PENGAJIAN TINGGI** menyatakan menyemak semula yuran pengajian di IPTA oleh kerana kebanyakan pelajar tidak tinggal di dalam kampus dan menggunakan fasiliti berkaitan.

**JAWAPAN**

Tuan Yang di-Pertua,

Kementerian Pengajian Tinggi (KPT) sentiasa prihatin terhadap maklum balas daripada para pelajar, ibu bapa dan pihak-pihak berkepentingan supaya yuran-yuran di Universiti Awam dapat dikurangkan dalam membantu meringankan beban kewangan pelajar dan ibu bapa akibat penularan wabak COVID-19. Dalam hal ini, KPT telahpun membuat rundingan dengan pihak Kementerian Kewangan Malaysia (MOF) bagi pengurangan bebanan kewangan pelajar. Sebagai tanda keprihatinan, Kerajaan telah bersetuju untuk mengurangkan kadar yuran asrama dan yuran aktiviti atau perkhidmatan UA sehingga 15 peratus setelah mengambil kira keupayaan kewangan Kerajaan dan UA.

Pengurangan yuran ini adalah bagi Semester Kedua Sesi Akademik 2019/2020 untuk pelajar warganegara Malaysia dalam tempoh Perintah Kawalan Pergerakan atau PKP. Pengurangan yuran ini akan melibatkan peruntukan sebanyak RM72 juta yang mana RM20 juta merupakan peruntukan tambahan Kerajaan dan RM52 juta menggunakan sumber dalaman UA. Seramai 523,318 pelajar UA di seluruh negara mendapat manfaat daripada inisiatif ini.

Pengurangan yuran ini adalah tambahan kepada bantuan-bantuan yang telah diberikan kepada pelajar sebelum ini seperti:

- i. Bantuan secara *one-off* sebanyak RM200 kepada setiap pelajar IPT di bawah Pakej Rangsangan Ekonomi Prihatin Rakyat melibatkan peruntukan sebanyak RM168,292,800 yang memberikan manfaat kepada 841,464 pelajar; dan
- ii. Peruntukan sebanyak RM52,202,412 disalurkan kepada lebih 82 ribu pelajar yang berada di dalam kampus semasa tempoh PKP bagi penyediaan makan minum mereka.

Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD FAHMI BIN MOHAMED FADZIL  
[ LEMBAH PANTAI ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan peratus pelajar sekolah rendah dan sekolah menengah yang gagal mengikut pembelajaran dalam talian sepanjang Perintah Kawalan Pergerakan sehingga hari ini dan apakah langkah-langkah yang akan diambil Kementerian bagi membolehkan pelajar-pelajar sekolah rendah dan sekolah menengah kembali ke sekolah.

**JAWAPAN**

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah menjalankan Kajian Kesiediaan Murid dalam Pembelajaran Secara dalam Talian pada 28 Mac hingga 2 April 2020. Kajian ini melibatkan 670,118 responden yang terdiri daripada ibu bapa kepada 893,331 murid. Dapatan kajian menunjukkan 6.0 peratus murid memiliki komputer peribadi, 9.3 peratus murid memiliki komputer riba, 5.8 peratus murid memiliki tablet dan 46.5 peratus murid memiliki telefon pintar. Di samping itu, terdapat juga murid yang memiliki lebih daripada satu peranti bagi kegunaan pembelajaran secara dalam talian. Namun, dalam masa yang sama, masih terdapat 36.9 peratus murid yang tidak mempunyai sebarang peranti bagi membolehkan mereka mengikuti pembelajaran secara dalam talian.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti bersesuaian. Di samping itu, terdapat juga kekangan dalam aspek tahap akses internet yang terhad. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Untuk makluman Ahli Yang Berhormat, KPM telah melaksanakan pembukaan semula sekolah secara berperingkat bermula pada 24 Jun 2020. Sebagai permulaan, pada 24 Jun 2020 hanya murid kelas peperiksaan awam, iaitu Sijil Pelajaran Malaysia, Sijil Vokasional Malaysia, Sijil Tinggi Pelajaran Malaysia dan Sijil Tinggi Agama Malaysia serta peperiksaan antarabangsa yang setara hadir ke sekolah.

Kemudian, diikuti dengan pembukaan semula prasekolah, tabika dan tadika pada 1 Julai 2020. Seterusnya, pembukaan semula sekolah untuk murid Tingkatan 6 Semester 1, Tingkatan 1 hingga Tingkatan 4, Kelas Peralihan serta Tahun 5 dan Tahun 6 pada 15 Julai 2020. Manakala, pembukaan semula sekolah bagi murid Tahun 1 hingga Tahun 4 adalah pada 22 Julai 2020.

Sebelum sekolah dibuka semula, pihak sekolah dan guru telah membuat persiapan rapi bagi memastikan keselamatan dan kesihatan murid, guru serta kakitangan sekolah sepanjang mereka berada di sekolah. KPM menyediakan Garis Panduan Pengurusan Pembukaan Semula Sekolah serta Garis Panduan Tambahan sebagai panduan. Setiap garis panduan yang disediakan telah mendapat pengesahan daripada Kementerian Kesihatan Malaysia (KKM) dan Majlis Keselamatan Negara (MKN).

Selain menyusun atur bilik darjah dengan mengambil kira penjarakan fizikal, persiapan penting lain adalah menyediakan peralatan dan bahan seperti alat pengimbas suhu badan, pensanitasi tangan dan sabun pencuci tangan yang mencukupi untuk warga sekolah. Bagi tujuan tersebut, KPM telah menyalurkan peruntukan kepada Jabatan Pendidikan Negeri (JPN), Pejabat Pendidikan Daerah (PPD) dan sekolah untuk melaksanakan proses perolehan dan perbekalan peralatan atau bahan yang diperlukan. Di samping itu, pihak sekolah ada menerima sumbangan peralatan yang diperlukan daripada pelbagai pihak.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. MASZLEE BIN MALIK [SIMPANG RENGAM]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan data terperinci pembelajaran online di seluruh negara sepanjang Perintah Kawalan Pergerakan mencakupi peratusan capaian oleh murid, guru, jumlah pelajar terlibat, jumlah pelajar yang terkesan dengan isu kekurangan "*hardware*" dan masalah mendapatkan talian internet serta apakah perancangan Kementerian untuk menyelesaikan masalah ini.

**JAWAPAN**

Tuan Yang di-Pertua,

Kementerian Pendidikan Malaysia (KPM) terus komited untuk memastikan semua murid di seluruh negara tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh PKP. KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid.

KPM telah menjalankan Kajian Kesediaan Murid dalam Pembelajaran Secara dalam Talian pada 28 Mac hingga 2 April 2020. Kajian ini melibatkan 670,118 responden yang terdiri daripada ibu bapa kepada 893,331 murid. Dapatan kajian menunjukkan 6.0 peratus murid memiliki komputer peribadi, 9.3 peratus murid memiliki komputer riba, 5.8 peratus murid memiliki tablet dan 46.5 peratus murid memiliki telefon pintar. Di samping itu, terdapat juga murid yang memiliki lebih daripada satu peranti bagi kegunaan pembelajaran secara dalam talian. Namun,

dalam masa yang sama, masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran secara dalam talian.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti yang bersesuaian. Di samping itu, terdapat juga kekangan dalam akses kepada internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Untuk makluman Ahli Yang Berhormat, sehingga 27 Julai 2020, 66 peratus murid, iaitu 3.1 juta daripada 4.7 juta murid yang mempunyai ID telah *login* dan menggunakan pelantar *Digital Education Learning Initiative Malaysia* (DELIMa) untuk mengakses sumber pendidikan dan mengikuti pembelajaran secara dalam talian. Jumlah ini menunjukkan peningkatan sebanyak 38.7 peratus berbanding hanya 1.9 juta murid pada 18 Mac 2020. Bagi guru pula, seramai 387,000 (94.1 peratus) orang daripada 411,000 orang guru yang mempunyai ID telah *login* untuk melaksanakan pengajaran dan pembelajaran secara dalam talian. Jumlah ini menunjukkan peningkatan sebanyak 14.2 peratus berbanding seramai 332,000 guru pada 18 Mac 2020.

Secara keseluruhan, KPM menyedari bahawa terdapat kelemahan dalam pelaksanaan *Home-Based Learning* yang menyebabkan keberkesanan pengajaran dan pembelajaran secara dalam talian agak terhad berbanding kaedah secara bersemuka. Oleh demikian, antara perkara utama yang dilaksanakan apabila sekolah dibuka semula ialah guru menilai tahap penguasaan murid. Seterusnya, guru mengambil tindakan sewajarnya bagi memastikan murid sekurang-kurangnya mencapai tahap penguasaan minimum dalam setiap mata pelajaran yang diikuti.

KPM akan sentiasa berusaha untuk meningkatkan lagi keberkesanan kaedah *Home-based Learning* dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuk pelaksanaan *Home-based Learning*. Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHOO POAY TIONG [KOTA MELAKA ]**

**TARIKH : 26 OGOS 2020 (RABU)**

**SOALAN**

Minta **MENTERI PENDIDIKAN** menyatakan :-

- (a)apakah status pengiktirafan sijil UEC sebagai syarat am kelayakan untuk memasuki institusi-institusi pengajian tinggi awam (IPTA); dan
- (b)apakah hasil dan syor-syor dalam laporan oleh Jawatankuasa Khas UEC.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah menubuhkan Pasukan Petugas Dasar *Unified Examination Certificate* (PPDUEC) pada 29 Ogos 2018 untuk mengkaji isu pengiktirafan sijil UEC sebagai syarat am kelayakan untuk memasuki institusi pengajian tinggi awam (IPTA). Pelantikan tiga orang ahli PPDUEC telah dibuat oleh YB Menteri Pendidikan pada ketika itu dan mula menjalankan tugas mulai 29 November 2018.

Berdasarkan Terma Rujukan, PPDUEC diberi tempoh tiga hingga enam bulan untuk mengemukakan laporan kajian kepada KPM. Walaupun tempoh kajian telah dilanjutkan sehingga 16 bulan, dengan enam kali pelanjutan tempoh kajian, iaitu sehingga Februari 2020, PPDUEC masih gagal menyerahkan laporan kajian berkenaan. Memandangkan tempoh kajian tidak dilanjutkan dan telah tamat pada 29 Februari 2020, maka keanggotaan PPDUEC juga tamat secara automatik pada tarikh yang sama, iaitu 29 Februari 2020.

Untuk makluman ahli Yang Berhormat, sehingga kini KPM tidak pernah menerima sebarang laporan awal, draf laporan atau laporan lengkap daripada PPDUEC, sepertimana yang ditetapkan semasa pelantikan dibuat. Oleh demikian, tiada sebarang hasil kajian dapat diperhalusi dan diteliti oleh KPM.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14 (2020)**

---

**PERTANYAAN : LISAN**

**DARIPADA : YB. TUAN JUGAH ANAK MUYANG @  
TAMBAT [ LUBOK ANTU ]**

**TARIKH : 12 OGOS 2020 (RABU)**

**SOALAN**

**YB. TUAN JUGAH ANAK MUYANG @ TAMBAT [ LUBOK ANTU ]** minta **MENTERI PELANCONGAN, SENI DAN BUDAYA** menyatakan adakah Kementerian merancang untuk menaik taraf kemudahan-kemudahan dan mempromosi Empangan Hidro Elektrik Batang Ai Lubok Antu memandangkan ianya produk pelancongan yang perlu dipelihara.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kerajaan Persekutuan telah melaksanakan 2 projek Peningkatan Kemudahan Pelancongan Sukan Air dan Rekreasi di Tasik Empangan Batang Ai di bawah Rancangan Malaysia Ke-9 (Fasa 1) dan Rancangan Malaysia Ke-10 (Fasa 2).
2. Skop projek ini meliputi menaik taraf pentas, pembinaan jeti dan ponton persinggahan, pembinaan jeti untuk memancing dan rekreasi seperti jeti pelancongan dan tempat pendaratan untuk jet ski, kayak dan perahu / bot, pembinaan wakaf-wakaf serta siar kaki konkrit.
3. Kedua-dua fasa projek bernilai RM4.995 juta itu telah pun siap dilaksanakan dan telah diserahkan kepada kerajaan Negeri, masing-masing pada tahun 2009 dan 2013. Selaku agensi pemilik dan agensi pelaksana, Majlis Daerah Lubuk Antu adalah pihak yang bertanggungjawab ke atas sebarang operasi dan penyelenggaraan kawasan pelancongan tersebut.
4. Bagi cadangan pembangunan projek pelancongan di bawah RMKe-12 yang akan datang, Kementerian ini sentiasa bekerjasama dengan agensi negeri terutama sekali Kementerian Pelancongan, Kesenian dan Kebudayaan Negeri Sarawak (MTAC) dalam mempertimbangkan sebarang cadangan pembangunan pelancongan domestik dan antarabangsa di Negeri Sarawak serta kawasan Lubok Antu khususnya bagi memastikan produk pelancongan di Malaysia dapat dibangunkan dan dapat memberi manfaat kepada masyarakat tempatan.
5. Di samping itu, promosi bersama oleh Tourism Malaysia, sebuah agensi di bawah seliaan Kementerian Pelancongan, Seni dan Budaya, bersama dengan Sarawak Tourism Board sentiasa dilaksanakan untuk merencanakan aktiviti pelancongan di kawasan Batang Ai yang kaya dengan tarikan eko pelancongan. Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 26 OGOS 2020 (RABU)**

**SOALAN**

**PUAN NURUL IZZAH BINTI ANWAR [ PERMATANG PAUH ]** minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada RUU Gangguan Seksual mengambil kira kelompongan akta asal yang dikenal pasti *Asian Strategy & Leadership Institute* termasuk perincian jenayah mengambil gambar tanpa keizinan, surat ugutan yang mengandungi gambar atau video peribadi, penghendapan dan penyebaran butiran peribadi tanpa kebenaran.

**JAWAPAN**

Tuan Yang di-Pertua,

Draf Rang Undang-Undang Gangguan Seksual (RUU GS) ini telah digubal melalui penubuhan satu pasukan projek khas yang terdiri daripada pihak berkepentingan merangkumi pelbagai Kementerian dan Agensi, ahli akademik, Pertubuhan Bukan Kerajaan (NGO) dan individu-individu yang mempunyai pengalaman dan pengetahuan berkenaan isu gangguan seksual dan perundangan.

Perkara utama yang diberi perhatian bagi memastikan draf yang digubal adalah komprehensif ialah dengan memastikan ia berupaya menangani kelompangan dalam sistem perundangan atau peraturan sedia ada seperti dalam Kanun Keseksaan [Akta 574], kod amalan, pekeliling dan

garis panduan yang hanya terpakai kepada sama ada sektor awam atau sektor swasta sahaja. Selain itu, draf RUU GS turut menggariskan definisi gangguan seksual yang lebih menyeluruh dan pemakaiannya tidak hanya terhad kepada sektor pekerjaan tetapi merangkumi tempat-tempat awam. Memandangkan takrifkan gangguan seksual di bawah RUU ini juga telah mengambil kira pelbagai bentuk dan medium ianya boleh dilakukan, perbuatan penghendapan dan penyebaran butiran, gambar atau video peribadi secara atas talian tanpa kebenaran juga menjadi suatu kesalahan. Namun begitu, satu peruntukan khusus berkenaan penghendapan dicadangkan untuk ditangani melalui pindaan Kanun Keseksaan.

Antara penambahbaikan lain yang diperkenalkan melalui RUU ini yang mampu mengatasi kekangan perundangan sedia ada ialah dengan meletakkan tanggungjawab untuk melapor serta menyiasat laporan kepada majikan yang menerima aduan bagi kes gangguan seksual.

Secara keseluruhannya, pengubalan RUU GS ini telah mengambil kira hasrat untuk memberikan kesedaran dan pendedahan kepada umum mengenai kesalahan gangguan seksual supaya dapat mencegah gangguan seksual daripada berlaku, di samping memberikan perlindungan kepada mangsa melalui langkah pemulihan (*redress*) yang sewajarnya.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. PUAN HAJAH FUZIAH BINTI SALLEH**  
**[KUANTAN]**  
**TARIKH : 26 OGOS 2020 (RABU)**

**SOALAN**

**PUAN HAJAH FUZIAH BINTI SALLEH [ KUANTAN ]** minta **MENTERI KEWANGAN** menyatakan mengapa terlalu ramai di kalangan Menteri, Timbalan Menteri serta Ahli Parlimen yang lain menerima Bantuan Prihatin Nasional sedangkan mereka automatik tidak layak dan bagaimana boleh terjadi perkara sedemikian.

**JAWAPAN**

Tuan Yang di-Pertua,

Bantuan Prihatin Nasional atau BPN merupakan salah satu bantuan yang disediakan oleh Kerajaan dalam Pakej Rangsangan Ekonomi Prihatin Rakyat yang diberikan secara *one-off* kepada golongan B40 dan M40. Pemberian BPN bagi golongan B40 adalah berdasarkan pangkalan data Bantuan Sara Hidup. Manakala BPN bagi golongan M40 adalah berdasarkan data percukaian Lembaga Hasil Dalam Negeri Malaysia (LHDNM).

Pemohon BPN adalah secara automatik dan tidak perlu mengemukakan sebarang bukti pendapatan. Ini adalah kerana semua permohonan akan disemak berdasarkan data agensi yang telah ditetapkan oleh Kementerian Kewangan Malaysia.

Semakan awal oleh LHDNM semasa proses penentuan kelayakan BPN yang melibatkan golongan M40 adalah berdasarkan data percukaian taksiran pendapatan individu pada tahun 2018 mengikut rekod LHDNM. Semakan mendapati data taksiran pendapatan individu adalah teratur dan kelulusan diberikan berdasarkan data tersebut.

Sekiranya penerima BPN termasuk di kalangan Ahli Parlimen yang ingin memulangkan semula bayaran BPN tersebut, penerima boleh berbuat demikian mengikut prosedur yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. PUAN KASTHURIRAANI A/P PATTO**  
**[BATU KAWAN]**  
**TARIKH : 26 OGOS 2020 (RABU)**

**SOALAN**

**PUAN KASTHURIRAANI A/P PATTO [ BATU KAWAN ]** minta **MENTERI KEWANGAN** menyatakan dengan jelas sama ada Kerajaan akan meneruskan galakan cukai pendapatan bagi majikan yang mengambil pekerja kumpulan sasaran mengikut “Kaedah-kaedah Cukai Pendapatan (Potongan bagi Penggajian Warga Emas, Bekas Banduan, Orang Diparol, Orang Diselia dan Bekas Penagih Dadah” yang akan tamat pada tahun ini. Jika tidak mengapa dan apakah galakan yang lain yang akan digunakan oleh Kerajaan.

**JAWAPAN**

Tuan Yang di-Pertua,

Bagi menggalakkan majikan mengambil bekerja golongan warga emas, bekas banduan, orang diparol, orang diselia dan bekas penagih dadah untuk kembali ke pangkuan masyarakat, galakan cukai potongan tambahan diberi ke atas kos penggajian golongan ini bermula dari tahun taksiran 2019 hingga 2020.

Sejak galakan cukai ini diperkenalkan mulai tahun taksiran 2019, Jabatan Penjara menyatakan bahawa sebanyak 193 buah syarikat yang telah menyertai program *Corporate Smart Internship* (CSI) melibatkan pengambilan seramai 4,134 orang diparol (ODP) dan 493 orang diselia (ODS) bagi tahun 2019 dan 2020.

Manakala bagi program di bawah Agensi Antidadah Kebangsaan (AADK), sebanyak 16 buah syarikat telah diberi pengesahan untuk galakan cukai ini melibatkan seramai 45 orang bekas penagih dadah.

Sebelum berakhirnya tahun taksiran 2020, Kerajaan akan meneliti dan menilai keberkesanan insentif ini terlebih dahulu sebelum sebarang keputusan untuk lanjutan galakan ini dibuat.

Sekian, terima kasih.

**PEMBERITAHUAN PERTANYAAN BAGI JAWAB LISAN  
DEWAN RAKYAT MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN MARIA CHIN BINTI ABDULLAH  
[PETALING JAYA]**

**TARIKH : 26 OGOS 2020 (RABU)**

**SOALAN**

Minta **MENTERI TENAGA DAN SUMBER ASLI** menyatakan sama ada Kementerian sedang mempertimbangkan syor bahawa Akta Perhutanan harus dipinda untuk mewujudkan jawatankuasa di peringkat tiap negeri untuk memainkan fungsi semak dan imbang.

**JAWAPAN**

**Tuan Yang di-Pertua,**

1. Untuk makluman Ahli Yang Berhormat, Kementerian pada masa ini sedang dalam peringkat akhir proses pindaan kepada Akta Perhutanan Negara [*Akta 313*]. Walau bagaimanapun, Kementerian tidak bercadang untuk memasukkan pindaan berkaitan pewujudan jawatankuasa di peringkat negeri untuk memainkan fungsi semak dan imbang.
2. Ini kerana, Perkara 74 (2) Perlembagaan Persekutuan memperuntukkan bahawa hutan adalah di bawah bidang kuasa Kerajaan Negeri yang mempunyai hak mutlak ke atas hasil hutan. Bidang kuasa Kementerian Tenaga dan Sumber Asli melalui Jabatan Perhutanan Semenanjung Malaysia adalah dalam memberikan nasihat teknikal mengenai pengurusan dan pembangunan hutan serta menjalankan penyelidikan dan khidmat latihan.
3. Dalam hal ini, platform Majlis Tanah Negara digunakan sebagai mekanisme semak dan imbang di mana perkara berkaitan pengurusan hutan akan dibentangkan dalam Majlis Tanah Negara untuk dibincangkan dan mencapai kata sepakat dalam memastikan pengurusan hutan negara dilaksanakan berdasarkan prinsip-prinsip pengurusan hutan secara berkekalan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN MUHAMMAD BAKHTIAR BIN**  
**WAN CHIK [BALIK PULAU]**  
**TARIKH : 26 OGOS 2020 (RABU)**

**SOALAN**

**TUAN MUHAMMAD BAKHTIAR BIN WAN CHIK [ BALIK PULAU ]** minta **MENTERI KEWANGAN** menyatakan sama ada inisiatif #MalaysiaKerja yang diperkenalkan oleh Kerajaan Pakatan Harapan akan dilaksanakan oleh Kerajaan baru. Sekiranya tidak, apakah inisiatif lain yang bakal diperkenalkan untuk mewujudkan peluang pekerjaan yang lebih baik untuk belia dan wanita dan mengurangkan kebergantungan terhadap pekerja asing.

**JAWAPAN**

Tuan Yang di-Pertua,

Program Malaysia@Work yang telah diumumkan dalam Belanjawan 2020 terpaksa ditangguhkan ekoran penularan wabak COVID-19.

Wabak COVID-19 telah mengakibatkan kemelesatan ekonomi dunia dan kadar pengangguran tertinggi. Malaysia tidak terkecuali dan telah turut mengalami pertumbuhan ekonomi negatif bagi suku kedua tahun 2020. Kadar pengangguran pula telah meningkat ke 5.3% pada Mei 2020, iaitu kadar tertinggi sejak 1986.

Kerajaan Perikatan Nasional telah mengambil langkah proaktif menangani impak kepada rakyat dan ekonomi dengan merangka pakej rangsangan PRIHATIN dan PENJANA. Langkah PRIHATIN dan PENJANA melibatkan suntikan ekonomi sebanyak RM260 bilion yang melibatkan perbelanjaan fiskal tambahan sebanyak RM45 bilion.

Perbelanjaan tambahan ini tertumpu kepada meringankan beban rakyat, khususnya melalui Bantuan Prihatin Nasional (BPN) yang memanfaatkan lebih 10 juta rakyat dengan perbelanjaan melebihi RM11 bilion. Memandangkan risiko kehilangan pekerjaan, Program Subsidi Upah juga telah diperkenalkan dengan peruntukan melebihi RM15 bilion. Setakat ini (7 Ogos), RM9 bilion telah dibelanjakan yang membantu mengekalkan 2.6 juta pekerjaan.

Selaras dengan keutamaan pada masa ini, Kerajaan terpaksa mengambil langkah untuk mengkaji semula dan menangguh beberapa program Belanjawan 2020, seperti Malaysia@Work bagi membantu membiayai keperluan perbelanjaan PRIHATIN dan PENJANA seperti BPN dan Subsidi Upah.

Saya percaya Yang Berhormat bersetuju dengan langkah ini supaya dilaksanakan dan program BPN dan Subsidi Upah diberi keutamaan.



Namun demikian, selain daripada mengekalkan pekerjaan melalui Program Subsidi Upah, program PENJANA juga memberi tumpuan kepada objektif menggalakkan majikan mewujudkan pekerjaan baharu bagi rakyat Malaysia yang menganggur. Sehubungan itu, Kerajaan telah menyediakan peruntukan RM2 bilion bagi program peningkatan kemahiran (dengan izin '*reskilling & upskilling*') bagi menyesuaikan modal insan kepada keperluan pekerjaan.

Selain itu, RM1.5 bilion disediakan bagi program insentif pengambilan pekerja yang mengandungi beberapa elemen program "Malaysia@Work", khususnya dalam memberi insentif kepada majikan secara bulanan di antara RM600 hingga RM1,000 sebulan untuk menggaji rakyat Malaysia yang menganggur. Seperti di bawah "Malaysia@Work", satu kategori khusus disediakan untuk menggalakkan penggajian perantisan (atau dengan izin "*apprentice*") daripada golongan lepasan sekolah atau graduan baharu. Satu penambahbaikan berbanding dengan "Malaysia@Work" adalah bantuan insentif tersebut diberi secara langsung kepada majikan dan tidak melalui sumbangan kepada KWSP.

Sekian, terima kasih.

**PEMBERITAHUAN PERTANYAAN BAGI JAWAB LISAN  
DEWAN RAKYAT MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SERI UTAMA HAJI MUKHRIZ  
BIN TUN DR. MAHATHIR [JERLUN]**

**TARIKH : 26 OGOS 2020 (RABU)**

**SOALAN**

Minta **MENTERI TENAGA DAN ALAM SEKITAR** menyatakan pendirian Kerajaan Persekutuan dengan rancangan Kerajaan negeri, khususnya Kerajaan Negeri Kedah untuk membenarkan semula aktiviti pembalakan, khususnya di pinggiran kawasan hutan simpan dan zon tadahan air.

**JAWAPAN**

Tuan Yang di-Pertua,

1. Perkara 74 (2) Perlembagaan Persekutuan telah memperuntukan bahawa perkara-perkara berkaitan tanah dan hutan adalah di bawah bidang kuasa Kerajaan Negeri. Kuasa eksekutif Kerajaan Persekutuan hanya terhad untuk memberi khidmat nasihat dan bantuan teknikal, latihan serta menjalankan penyelidikan berkaitan perhutanan.
2. Walau bagaimanapun, Kementerian ini tidak bersetuju dengan perancangan Kerajaan Negeri Kedah untuk membenarkan semula aktiviti pembalakan, khususnya di pinggiran kawasan hutan simpan dan zon tadahan air.
3. Ini kerana aktiviti pembalakan di pinggiran kawasan hutan simpan dan zon tadahan air akan menjejaskan kawasan tersebut terutamanya dari segi kualiti dirian hutan serta ekosistem di kawasan tersebut. Selain itu, ianya juga akan memberi kesan kepada sumber air bersih yang dibekalkan oleh kawasan tersebut yang akan turut menjejaskan kualiti hidup rakyat. Sekian, terima kasih.

**PEMBERITAHUAN PERTANYAAN BAGI JAWAB LISAN  
DEWAN RAKYAT MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK IGNATIUS DARELL LEIKING  
[PENAMPANG]**

**TARIKH : 26 OGOS 2020 (RABU)**

**SOALAN**

Minta **MENTERI TENAGA DAN SUMBER ASLI** menyatakan status projek perintis penanaman Hemp yang telah dimulakan pada 2019 dan juga penggubalan dasar Kementerian yang membolehkan industri gentian/fiber Hemp dimajukan sebagai 'the new cash crop' dan juga industri 'Medical Marijuana' dalam bidang perubatan.

**JAWAPAN**

Tuan Yang di-Pertua,

Penanaman *Cannabis sativa* atau hemp adalah dilarang dan tidak dibenarkan kecuali untuk tujuan penyelidikan mengikut Akta Dadah Berbahaya 1952. Sebelum *Cannabis sativa* atau hemp ditanam bagi tujuan industri mahupun perubatan, R&D yang terperinci perlu dilaksanakan terlebih dahulu bagi meneroka potensi penanaman hemp di Malaysia. Kementerian Tenaga dan Sumber Asli (KeTSA) dengan kerjasama Kementerian Kesihatan dan Kementerian Pertanian dan Industri Makanan serta agensi-agensi berkepentingan lain sedang memuktamadkan cadangan penanaman hemp untuk tujuan penyelidikan.

Cadangan penanaman hemp untuk tujuan penyelidikan ini memerlukan tempoh 2 hingga 3 tahun dengan mengambil kira pelbagai faktor merangkumi kawalan dari aspek perundangan, pemantauan dan keselamatan. Kementerian juga sedang memperhalusi Protokol Penanaman *Cannabis sativa* dengan usahasama semua Kementerian dan Jabatan yang terlibat. Protokol ini akan mengambil kira keperluan-keperluan dari aspek keselamatan, pematuhan kepada garis panduan Kementerian Kesihatan serta Akta Dadah Berbahaya 1952.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS TAHUN 2020**

---

**PERTANYAAN : LISAN**

**DARIPADA : TUAN WILLIAM LEONG JEE KEEN  
[SELAYANG]**

**TARIKH : 26 OGOS 2020**

**SOALAN**

Minta **MENTERI PERTANIAN DAN INDUSTRI MAKANAN** menyatakan status perundingan untuk pembebasan kapal-kapal nelayan Malaysia yang ditahan Indonesia dalam kawasan pertindihan perairan dan untuk memberikan butir-butir termasuk nombor pendaftaran kapal yang telah dipulangkan.

**JAWAPAN**

Tuan Yang Dipertua,

Sejak tahun 2017 sehingga sekarang, sebanyak 53 vesel nelayan Malaysia telah ditahan oleh pihak berkuasa Indonesia melibatkan kru nelayan tempatan dan asing.

Isu sempadan maritim antara Malaysia-Indonesia telah sekian lama dipertikaikan dan menjadi tuntutan kedua-dua negara. Kawasan yang dipertikaikan oleh kedua-dua negara mempunyai sumber perikanan yang banyak dan turut menjadi tumpuan nelayan tempatan bagi menjalankan aktiviti menangkap ikan.

Isu pembebasan nelayan dan bot nelayan tempatan yang ditahan di Indonesia telah mula dirundingkan pada November 2017 dan masih dalam proses perbincangan di antara pihak berkuasa

## **SOALAN NO : 54**

kedua-dua negara. Berdasarkan undang-undang di Indonesia, mana-mana bot nelayan asing yang didapati bersalah kerana menceroboh perairan Indonesia akan dilucuthak dan dimusnahkan.

Walau bagaimanapun, kerajaan telah menghantar senarai bot-bot nelayan Malaysia yang ditahan kepada pihak berkuasa Indonesia melalui Malawakil di Jakarta untuk pertimbangan bagi dibebaskan tetapi masih belum mendapat maklumbalas daripada pihak berkuasa Indonesia.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KE-14 (2020)**

---

**PERTANYAAN : LISAN**

**DARIPADA : YB DATO' SERI AHMAD FAIZAL BIN  
DATO' AZUMU [ TAMBUN ]**

**TARIKH : 26 OGOS 2020 (RABU)**

**SOALAN**

**YB DATO' SERI AHMAD FAIZAL BIN DATO' AZUMU [ TAMBUN ]** minta **MENTERI PELANCONGAN, SENI DAN BUDAYA** menyatakan pengisytiharan Pulau Pangkor sebagai Pulau Bebas Cukai (PCB) dengan peruntukan keseluruhan RM486 juta menjadi antara projek berimpak tinggi yang telah dilaksanakan di Perak dalam Rancangan Malaysia Ke-12 (RMKe-12). Harapan rakyat Perak agar Pulau Pangkor menjadi terkenal seperti Pulau Langkawi walaupun ia lebih kecil dari segi saiznya namun mempunyai tarikannya yang tersendiri. Walau bagaimanapun, kemudahan infrastruktur masih kurang dan tidak mencukupi bagi sebuah pulau yang berstatus bebas cukai. Minta Kementerian menyediakan peruntukan khas supaya infrastruktur di Pangkor dinaik taraf untuk promosi pelancongan yang lebih giat, khususnya cadangan kenderaan elektrik di Pangkor bagi pelan jangka panjang.

**JAWAPAN**

Tuan Yang di-Pertua,

1. Kementerian Pelancongan, Seni Dan Budaya Malaysia (MOTAC) telah melaksanakan 16 projek pembangunan pelancongan di Pulau Pangkor, Perak dengan peruntukan berjumlah RM18.944 juta di bawah Rancangan Malaysia Ke-9 dan Rancangan Malaysia Ke-10.
2. Untuk makluman, projek terkini yang diluluskan di bawah Rancangan Malaysia Ke-11 ialah Projek Peningkatan Kemudahan Pelancongan di Galeri Pangkor, Pulau Pangkor, Perak. Projek ini sedang giat dilaksanakan oleh Majlis Perbandaran Manjung (MPM) selaku Agensi Pelaksana.
3. Sementara itu, adalah dimaklumkan bahawa Rancangan Malaysia Ke-12 akan bermula pada tahun 2021. Dalam hal ini, Ahli Yang Berhormat boleh mengemukakan sebarang cadangan pembangunan infrastruktur pelancongan yang bersesuaian melalui Unit Perancang Ekonomi Negeri (UPEN) Perak. Permohonan yang dikemukakan melalui UPEN Perak seterusnya akan dinilai kebolehlaksanaannya oleh pihak MOTAC sebelum diperakukan untuk pertimbangan Unit Perancang Ekonomi, Jabatan Perdana Menteri.
4. Pada masa yang sama, MOTAC melalui agensinya, Tourism Malaysia sentiasa secara aktif mempromosikan Malaysia sebagai destinasi pelancongan yang unggul bagi menjana pendapatan utama dalam pembangunan sosio-ekonomi negara.
5. Dalam usaha memajukan industri pelancongan di Negeri Perak, khususnya Pulau Pangkor sebagai destinasi pelancongan yang menarik kepada para pelancong domestik dan antarabangsa, MOTAC bekerjasama rapat dengan Kerajaan Negeri Perak, badan-badan Bukan Kerajaan (NGO) dan sektor swasta. Antara aktiviti dan kempen promosi yang dilaksanakan adalah:
  - i) penyertaan di PATA *Dream to Travel Festival 2020*;
  - ii) promosi Kempen Pelancongan Domestik- Cuti-Cuti Malaysia;



- iii) program Penyerahan Sijil Pematuhan Garis Panduan Amalan Terbaik Produk Pelancongan di Negeri Perak Pasca Covid 19;
- iv) inisiatif mewujudkan 1,500 keping *Travel Vouchers #TravelPerakLah* Pasca Covid 19;
- v) program *Business To Business* (B2B) Peringkat Negeri Perak;
- vi) penganjuran pertandingan *Pride of Perak* (POP) *Travels - Cer Citer*;
- vii) program *webinar* yang memfokuskan produk-produk di Wilayah Utara termasuk di Negeri Perak bertajuk Kesana Kesini sebanyak 5 siri;
- viii) *Webinar Perak Online Tourism Symposium 2020*;
- ix) *menerbitkan Booklet 'Pakej MYexperience'*;
- x) *mengadakan Familiarization Trip* (Fam Trip) ke Pulau Pangkor;
- xi) mempromosikan Pulau Pangkor sebagai pulau bebas cukai (PBC); dan
- xii) memuat naik rakaman video program-program kesenian tradisional yang menjadi identiti negeri Perak ke dalam laman media sosial.

Sekian, terima kasih.